

C40
4514
(175)



C40-4514

丁卯年正月
家書置於
杖微英培院
為學者不
當山二世
鐵十機護誌



B 64853

元高峰大師語錄序

始予乍閱內典得經論并古今雜著其數帙中有大
師語驚喜信受如闇逢炬至於今猶然蓋自來叅究
此事最極精銳無逾師者真似純鋼鑄就一回展讀
一回激發人意氣俾踴躍淬礪忘倦雖悟處深玄不
敢以凡臆窺測而但覺其直截根原脫落窠臼近有
慈明妙喜之風遠之不下德山臨濟諸老偉哉堂堂
平可謂照末法之光明幢也獨恨大藏未收坊刻尙
渺怏怏於胸中者三十年迺今以其舊本重壽諸梓
而蓮社行人有相顧耳語者謂予旋流萬流指歸淨



土柰何復殷勤稱讚是編意者念阿彌陀佛不及看
萬法歸一耶遂洶洶搖動嗟乎但了念佛是誰不必
問一歸何處茲有人焉知生我是父又自疑身從何
來聞者寧不絕倒古尊宿云如人涉遠以到爲期不
取途中強分難易諸仁者方便門多歸元路一願勿
以狐疑玩愒歲時便應在疾趨爲到家計既到家已
千丈巖七寶池有智主人二俱不受

萬曆二十七年歲次己亥佛歡喜日雲棲株宏謹識

高峰大師語錄

湖州雙髻菴法語

師自咸淳甲戌春就菴示衆乃云談玄談妙說性說
心攢花簇錦巧妙尖新如麻似粟從古至今莫不皆
是乘虛接響底漢倚草附木精靈山僧雖是他家種
草決定不向遮裏藏身旣然如是且道今日爲衆開
堂斬新條令一句又作麼生喝一喝云符到奉行
示衆有一物明歷歷佛祖覷不破大地無人識常在
舌頭尖盡力吐不出吐得出也是胡餅裏呷汁
示衆有句無句金烏吞玉兔如藤倚樹癩馬繫枯椿

百法言金月

高峯語錄雙髻

樹倒藤枯一冬燒不盡句歸何處石虎當途踞呵呵
大笑龍頭蛇尾捺倒爛泥裏剛刀不斬無罪之人且
道瀉山過在甚麼處乃呵呵大笑下座

示衆千嶺萬山雪五湖四海水清光成一片物物盡
皆明且道趙州柏樹子雲門乾屎橛洞山麻三斤畢
竟是個甚麼喝一喝云明星當午現猶待曉鷄鳴

歲旦示衆百年難遇歲朝春姹女梳粧越樣新惟有
東村王大姐依前滿面是埃塵

解制示衆九旬把定繩頭不容絲毫走作直得箇箇
皮穿骨露七零八落冷眼看來正謂掘地討天千錯

萬錯今日到遮裏不免放開一線彼此無拘無束東
西南北任運騰騰天上人間逍遙快樂然雖如是且
道忽遇鑊湯爐炭劍樹刀山未審如何棲泊良久云
惡

示衆萬里不掛片雲虛空突出一竅雙髻峰踔跳上
三十三天拄杖子向十字街頭揚聲大叫且道咄箇
甚麼以拂子擊禪牀云炎炎六月火生水夜半日輪
當午照

示衆一夏九十日看看又將半面門無位人急著眼
睛看冷地驀相逢脚跟紅線斷掌內握乾坤翻身遊

碧漢堪笑當年老瑞巖惺惺石上重呼喚乃豎起拂
子云大眾遮箇是瑞巖王人公耶是臨濟無位真人
耶若也定當得出許你一生叅學事畢脫或不然擲
下拂子云撒向堦前來朝打筭

示衆五湖春色十分肥正是功圓果滿時玉蝶穿花
零碎錦黃鶯擲柳亂垂絲靈雲打失娘生眼備老重
添八字眉無限水邊林下客謾將竹杖度須彌

示衆三世諸佛說不到開口道著歷代祖師行不到
動步踏著行說俱到時如何正好行脚

歲旦示衆山僧去年三十六今年又添一歲諸人共

知拈拄杖云且道拄杖子年多少擊禪牀云元正啓
祚萬物咸新

示衆舉南泉示衆云文殊普賢昨夜三更起佛見法
見各與二十棒眨向二鐵圍山所供並實趙州出云
棒教阿誰喫泉云過在甚麼處一對無孔鐵槌州便
禮拜泉歸方丈蒼天中更添怨苦南泉和尚雖則頂
門具眼賞罰分明點檢將來也是虛空裏釘橛若無
趙州後語未審如何折合高峰不然忽有人起佛見
法見但向他道善哉善哉時節若至其理自彰
示衆百千諸佛歷代祖師乃至天下老和尚以拂子

擊禪牀一下云總向遮裏墮坑落塹還有跳得出底麼又擊一下云三生六十劫

示衆舉丹霞因過一院值疑寒遂於殿中見木佛乃取燒火向院主偶見呵責曰何得燒我木佛霞以杖撥灰云吾燒取舍利主云木佛何有舍利霞云旣無舍利更請兩尊再取燒之院主自後眉鬚墮落師拈云丹霞燒木佛爲寒所逼豈有他哉院主眉鬚墮落偶爾成文何足疑矣若作佛法商量管取入地獄如箭擲拂子

下座

示衆歸宗拭却眼睛一祖安心斷臂雲門拶折一足

玄沙墜破脚指遮一火隨樓披漢以拂子卅卅云蚤知有遮般消息免見血淋滿地

示衆以拄杖橫肩顧左右云大衆會麼柳樛橫肩不顧人直入千峰萬峰去

△杭州西天目山師子禪寺法語

至元丁亥冬衆請師開堂遂就石室內拈香祝聖罷次拈香云此一瓣香不假壺中日月亦非劫外春風幾番親遭毒手直得八面玲瓏如今放下也地搖六震拈來則塞破虛空且道不拈不放一句又作麼生喝一喝作女人拜爇向爐中供養前住仰山戴角披

毛無鼻孔底老和尚用酬法乳之恩遂就座僧問十方同聚會箇箇學無爲此是選佛場心空及第歸龐居士恁麼道還有爲人處也無師云有進云畢竟在那一句師云從頭問將來進云如何是十方同聚會師云龍蛇混雜凡聖交參進云如何是箇箇學無爲師云口吞佛祖眼蓋乾坤進云如何是選佛場師云東西十萬南北八千進云如何是心空及第歸師云動容揚古路不墮悄然機進云恁麼則言言見諦句句朝宗師云你甚處見得僧喝師云也是掉棒打月進云此事且止只如西峰今日十方聚會選佛場開

畢竟有何祥瑞師云山河大地萬象森羅情與無情悉皆成佛進云旣皆成佛因甚學人不成佛師云你若成佛爭教大地成佛進云畢竟學人過在甚麼處師云湘之南潭之北進云還許學人懺悔也無師云禮拜著僧纔拜師云獅子咬人韓獪逐塊師乃豎拂召大衆云此是選佛場心空及第歸伶俐漢若向遮裏見得便見龐居士安身立命處旣見龐居士安身立命處便見從上佛祖安身立命處旣見佛祖安身立命處便見自己安身立命處旣見自己安身立命處不妨向遮裏拗折拄杖高掛鉢囊二條椽下七尺

單前咬無米飯飲不濕羹伸脚打眠逍遙度日若是
奴郎不辨菽麥不分抑不得已按下雲頭向虛空裏
書一本上大人教諸人依樣畫貓兒去也山僧昔年
在雙徑歸堂未及一月忽於睡中疑著萬法歸一一
歸何處自此疑情頓發廢寢忘食東西不辨晝夜不
分開單展鉢屙屎放尿至於一動一靜一語一默總
只是箇一歸何處更無絲毫異念亦要起絲毫異念
了不可得正如釘釘膠粘撼搖不動雖在稠人廣眾
中如無一人相似從朝至暮從暮至朝澄澄湛湛卓
卓巍巍純清絕點一念萬年境寂人忘如癡如兀不

覺至第六日隨衆在三塔諷經次擡頭忽覩五祖演
和尙真讚驀然觸發日前仰山老和尚問拖死屍句
子直得虛空粉碎大地平沉物我俱忘如鏡照鏡百
丈野狐狗子佛性青州布衫女子出定話從頭密舉
驗之無不了了般若妙用信不誣矣前所看無字將
及三載除二時粥飯不會上蒲團困時亦不倚靠雖
則晝夜東行西行常與昏散二魔輟作一團做盡伎
倆打屏不去於遮無字上竟不會有一餉間省力成
片自決之後鞠其病源別無他故只爲不在疑情上
做工夫一味只是舉舉時卽有不舉便無設要起疑

亦無下手處設使下得手疑得去只頃刻間又未免
被昏散打作兩撇於是空費許多光陰空喫許多生
受畧無此子進趣一歸何處却與無字不同且是疑
情易發一舉便有不待返覆思惟計較作意纔有疑
情稍稍成片便無能爲之心旣無能爲之心所思卽
忘致使萬緣不息而自息六窓不靜而自靜不犯纖
塵頓入無心三昧忽遇吃粥吃飯處管取向鉢盂邊
摸著匙筯不怕甕中走却鼈此是已驗之方決不相
賺如有一句誑惑諸人自招永墮拔苦犁耕現前學
般若菩薩必要明此一段大事不憚山高水濶特特

來見西峰况兼各各然指然香立戒立願礪齒磨牙
辦鐵石志旣有如是操畧如是知見切須莫負自己
初心莫負父母捨汝出家心莫負新建僧堂檀信心
莫負國王大臣外護心直下具大信去直下無變異
去直下壁立萬仞去直下依樣畫猫兒去畫來畫去
畫到結角羅紋處心識路絕處人法俱忘處筆端下
驀然突出箇活猫兒來因元來畫大地是箇選佛場
畫大地是箇自己到遮裏說甚龐居士直饒三乘十
地膽喪竄驚碧眼黃頭容身無地然雖如是若要開
鑿人天眼目發揚佛祖宗猷更須將自己與選佛場

鑄作一團颺在百千萬億世界之外轉身移步向威音那邊更那邊打一遭却來喫西峰痛棒大眾既是和自己颺了又將甚麼吃棒忽有箇不顧性命底漢子聞恁麼舉出來掀倒禪牀喝散大眾是則固是要且西峰師子巖未肯點頭在

上堂無邊刹境自他不隔於毫端十世古今始終不離於當念只如山僧每日在張公洞裏橫眠豎眠或歌或詠諸人還知麼諸人每日在選佛場前東行西行或嗔或喜山僧還知麼若也彼此知得不免分身確搗拔舌犁耕若也彼此不知管取釋迦拱手彌勒

飯依因甚如此不見道知之一字衆禍之門

上堂萬法歸一一歸何處乃顧視左右下座

上堂盡十方世界是箇鉢孟汝等諸人吃粥吃飯也在裏許屙屎放尿也在裏許行住坐臥乃至一動一靜總在裏許若也識得達磨大師只與你做箇洗脚奴子若也不識一時粥飯將甚麼吃

元正上堂新年頭行新令露柱燈籠急著眼聽竈頭西南角有片方磚惺惺伶俐伶俐惺惺念茲在茲必恭必敬因甚如此徐十三郎行年本命

上堂愛之欲其生惡之欲其死愛惡兩重關以拄杖

①總向遮裏起直饒識得根源更買草鞋行脚三十年以拄杖卅一何曾踏著遮裏擲拄杖云你有拄杖子與你拄杖子

上堂卓拄杖云師子窟師子吼師子兒無前後驀然直下翻身便解人前開口卽今莫有翻身底麼擲拄杖云鰍跳不出斗

結制上堂大限九旬小限七日瓮中有細細中有密密密無間纖塵不立正甚麼時銀山鐵壁進則無門退之則失如墮萬丈深坑四面懸崖荆棘切須猛烈英雄直要翻身跳出若還一念遲疑佛亦救你不得

此是最上玄門普請大家着力山僧雖則不管閑非越例與諸人通箇消息①②③④

因從一禪人有省上堂二十餘年布箇縵天網子打鳳羅龍竟不曾遇著一箇鰍鱗今日不期有個螻蛄蟲撞入網中固是不堪上眼三十年後向孤峰絕頂揚聲大叫且道叫箇甚麼大地山河一片雪

上堂昨夜夢中作得一偈舉似大眾良久云忘却了也驀拈拄杖云拄杖子還記得麼良久云同坑無異土

浴佛上堂奉世尊纔生下乃一手指天一手指地周

行七步目顧四方云天上天下惟吾獨尊師云見怪不怪其怪自壞大衆會麼更聽一頌指天指地展戈矛直至如今戰不休假使羣靈都殺盡一身還有一身愁

祈時上堂天關久鎖不開容日夜滂沱鼓黑風以拂子擊禪牀一下云憤性一槌俱擊碎頂門迸出一輪紅

中夏上堂以拂子○一四十五日前薦得非特日消萬兩黃金亦乃能應四天下供養四十五日後薦得寸絲滴水也當牽犁拽杷償他以拂子擊禪床一下

云曾經巴峽猿啼處不是愁人也斷腸

上堂忘却當年密授句枉教一衆吃辛苦夜來枕上忽憶著年年五月黃梅雨

上堂一葉落天下秋一塵起大地收喝一喝云有意氣時添意氣不風流處也風流

上堂海底泥牛銜月走巖前石虎抱兒眠鐵蛇鑽入金剛眼崑崙騎象鷲牽此四句內有一句能殺能活能縱能奪若檢點得出許汝一生叅學事畢

直翁居士至上堂山僧有一奇特因緣未嘗輕易拈出今日幸遇直翁證明供養大衆良久云美食不中

飽人食

冬至上堂陰向鼻端滅陽從眼裏生會得箇中意更
叅二十年

上堂夜夜抱佛眠上大人朝朝還共起丘乙巳起坐
鎮相隨化三千語默同居止七十士纖毫不相離尔
小生如身影相似八九子欲識佛住處佳作仁只遮
語聲是可知禮也傳大士和聲吐出耀古騰今妙上
座矢上加尖一場好笑伶俐漢纔聞舉著如珠在掌
如芥投針若是機思遲鈍三搭不回昔年吾佛世尊
由斯之輩二七思惟計盡情忘不免全身放倒今日

山僧到遮裏也只得依條攀例按下雲頭倒轉鎗旗
就窠打劫直教一箇箇不假乘舟鼓棹游戲如來大
圓覺海以拂子打圓相云還見麼以拂子擊禪床一
下云還聞麼蒼天蒼天正所謂有耳不聞圓頓教有
眼不見舍那身說甚長期短期百千萬億阿僧祇鼻
孔依前向下垂擲下拂子喝一喝下座

普請上堂禪不在叅道不須悟動轉施爲山嶽鼓舞
孟八郎漢便恁麼去爭似西峰撒石運土

上堂昨夜東西兩天目議論狗子有無佛性話儘儘
爭之不已山僧未免 向他道說有說無總未夢

見在於是二邊慙懽而退大眾既謂有無俱不是畢
竟合作麼生八角磨盤空裏走三脚驢子弄蹄行
因事上堂水中鹹味色裏膠青決定是有不見其形
豎拂子云見其形失却山前一村人眼睛

上堂八日中千說萬喻說也說到無說時聞也聞
到無聞處既是無說又無聞功成果滿憑何舉吹龍
笛擊鼉鼓皓齒歌細腰舞桃花亂落如紅雨

結制上堂西峰今年結夏有一奇特事不得不告報
諸人且道是甚奇特事龍蛇混雜凡聖同居

上堂大海無魚大地無草大富無糧大悟無道若人

透此四重關非特親見高峰眉毛長短鼻孔淺深猶
如赫日當空萬別千差無不照雖然喚作拂子則觸
不喚作拂子則背畢竟喚作甚麼

中夏上堂豎拂子召大眾云到遮裏進前一步也不
得退後一步也不得總不恁麼也不得畢竟如何不
得不得

解制上堂布袋頭開餒驢餒馬要騎便騎要下便下
若到江西湖南撞著焦尾大蟲切莫道在西峰度夏
上堂吃粥了也洗鉢盂去矢上加尖一場敗露西峰
今日忍俊不禁却要向鷺鷥腿上割股良久云便恁

麼去

開爐上堂豎起拂子云遮些火種自靈山傳至西峰
已得二千二百二十餘載今日幸遇開爐特爲諸人
拈出以拂子吹一吹乃擲下云照顧燒却眉毛
冬至上堂良久云一陽來復萬物咸新恭惟盲龜跛
鼈鬼怪妖精莫問前長後短大家扶起破沙盆
臘八上堂黃面瞿曇夜半成道正是喚奴作郎贏得
一場好笑山僧恁麼告報也是細姑嫌嫂

晚叅叅須實叅悟須實悟動轉施爲輝今耀古若是
操心不正悟處不真粧粧點點鬪釘釘被人輕輕
拶著未免喚燈籠作露柱且道如何是實叅實悟底
消息良久云南山起雲北山下雨

上堂西峰今日啓建圓覺長期有四件切要事告報
大衆第一不得隔壁聽聲第二不得暗裏偷光第三
不得指東話西第四不得鬧中取靜汝等諸人誠能
遵行此令管取尅日成功超凡入聖若也不然縱歷
阿僧祇敢道未徹在

上堂舉鵝湖和尚示衆云未了底人長時浮逼逼地
設使了得底人明得知有去處尚乃浮逼逼地上大
人丘乙巳雲門舉問首座云適來和尚道未了底人

浮逼逼地了得底人浮逼逼地意作麼生座云浮逼逼地可知禮也門云首座在此頭白齒黃作遮箇語話曲則全座云上座作麼生門云要道卽得見卽便見若不見莫亂道枉則直座云只如堂頭和尚道浮逼逼地又作麼生門云頭上著枷脚下著杻重言不當吃座云恁麼則無佛法也親言出親口門云此是文殊普賢大人境界是何言歟二老披肝瀝膽西峰雪上加霜還見鵝湖也無若道見端的在那一句若道不見論訛在甚麼處具眼底試點出看

冬至上堂世間動不動法皆屬陰陽遷變鷲拈拄杖

云惟有山僧木上座能爲萬象主不逐四時凋乃靠拄杖云無形本寂寥

上堂低頭覓天仰面尋地波波拏拏遠之遠矣驀然撞著徐十三郎喫元來只在遮裏以手拍膝一下云在遮裏臘月三十日到來也是開眼見鬼

上堂舉香巖和尚一日上堂時有僧問不慕諸聖不重已靈如何巖云萬機休罷千聖不携臘月扇子此時疎山在衆作嘔聲曰是何言歟低聲低聲巖云阿誰衆曰師叔巖云不肯老僧那出云是胡來胡現巖云汝莫道得麼山云道得平地干戈巖云汝試道看

山云若教某甲道須還師資禮始得赤眼撞著火柴頭嚴乃禮拜舉前話問之山曰何不道肯諾不得全草賊大敗嚴云直饒恁麼道也須倒屣三十年設使住山無柴燒近水無水吃分明記取棒打石人頭曝曝論實事後住疎山果如前記大衆二老互相屈辱西峰從頭解注還分優劣也無若謂不分因甚倒屣三十年若謂分漏逗在甚麼處伶俐漢縮素得出非惟截斷天下人舌頭穿却天下人鼻孔釋迦彌勒與你作奴亦不爲差其或不然更聽一頌洞徹是非如夢幻轉身未免墮深坑須知別有通霄路不許時人

造次行

上堂拈拄杖召大衆云還見麼人人眼裏有睛不是瞎漢決定是見以拄杖卓一下云還聞麼箇箇耳裏有竅不是死漢決定是聞既見既聞是箇甚麼以拄杖○見聞卽且止只如六根未具之前聲色未彰之際未聞之聞未見之見正恁麼時畢竟以何爲驗以拄杖①吾今與汝保任斯事終不虛也以拄杖②三十年後切忌妄通消息靠拄杖下座

雪巖和尚忌拈香昔年瞎却我眼今朝穿却你鼻冤冤相報無休莫若克已復禮遂插香以袖掩面作哭

聲復以坐具搭左肩上作女人拜云非惟和光同塵
免得通相鈍置

上堂一年已滅五日光影如駒過隙直須如救頭然
切莫隨情放逸卓拄杖云夜來一兩雪消鎔萬疊青
山如洗出

元宵上堂叅禪須是鐵漢著手心頭便判只如雪覆
千山孤峰不白作麼生判擲拄杖云上元定是正月
半

上堂舉百丈和尚問潞山云併却咽喉唇吻道將一
句來山云却請和尚道師拈云大小潞山推惡離已

今日忽有人問西峰併却咽喉唇吻道將一句來卽
向他道柴荒米貴忍饑無暇祇對

佛涅槃上堂周行七步猶成跡柳示雙趺豈易收微
雨灑花千點淚淡烟籠竹一堆愁

晚叅身貧道貧無法可親一味盲枷瞎棒聞者見者
莫不生嗔卓拄杖云黃金自有黃金價終不和沙賣
與人

結制上堂西峰今年結夏全然不成保社一日兩頓
薄粥大家忍飢無暇雖有真如佛性菩提涅槃和聲
擲拄杖云權且颺在師子巖下

上堂終日著衣未嘗掛一縷絲終日吃飯未嘗咬一粒米既然如是且道卽今身上著底每日口裏吃底是箇甚麼到遮裏不論明與不明徹與不徹寸絲滴水也當牽犁拽杷償他何故一片白雲橫谷口幾多歸鳥自迷巢

上堂若論此事只要當人的有切心纔有切心真疑便起真疑起時不屬漸次直下便能塵勞頓息昏散屏除一念不生前後際斷纔到遮般時節管取推門落曰若是此念不切真疑不起饒你坐破蒲團百千萬箇依舊日午打三更

上堂迷中有悟悟復還迷直須迷悟兩忘人法俱遣衲僧門下始有語語分大衆既是迷悟兩忘人法俱遣共語話者復是阿誰速道速道

上堂諸方拈槌豎拂接物利生祇解指虛空說虛空指燈籠露柱說燈籠露柱於是藥頭無驗誤人多矣西峰要向未有虛空名字以前說虛空未有燈籠露柱以前說燈籠露柱要使聞者見者醒著磕著一得未得一證永證大衆未有名字以前畢竟憑何施設以拂子擊禪床一下又連擊兩下

上堂日正暄春已暮落花片片隨流去拈拄杖云拄

杖杖頭一點紅馨香遍界無人顧大眾顧不顧卽且
止畢竟一歸何處擲拄杖下座

解制上堂一夏以來諸人懣懣山僧亦懣懣懣懣逢
懣懣彼此無空過今朝聖制告圓不免更說些懣懣
禪癡得大家俱懣懣如何是懣懣禪咄猛火著油煎
除夜小叅一年三百六十日看看逗到今宵畢十箇
有五隻叅禪禪又不知學道道亦不識只遮不知不
識四字正是三世諸佛骨髓一大藏教根源伶俐漢
纔聞舉著如龍得水似虎靠山天上人間縱橫無礙
然雖如是點檢將來猶是遮邊底消息若謂那邊更

那邊一著子直饒西天四七唐土二二以至天下老
古誰敢保未徹在山僧與麼告報忽有箇漢子心憤
憤口俳俳出來道高峰高峰你有甚長處開得遮般
大口只向他道來年更有新條在惱亂春風卒未休
直翁居士施僧鞋上堂以手指云以此施者入無間
獄施者受者既遭此報汝等諸人還知利害處麼以
手合掌云難消

結制上堂封却拄杖頭結却布袋頭大家團欒頭赤
眼火柴頭喫正是冤家共聚頭不妨頭上更安頭以
拄杖打散

中夏上堂前四十五日何處去焦尾大蟲入關市後
四十五日何處來三脚驢子上高臺俊鷹快鷄便合
乘時跛鼈盲龜徒勞跽跳

上堂今年一期有五件好事特爲諸人分明揭示第
一好僧堂第二好後架第三好知事第四好厨堂第
五好衲子若作佛法商量掉棒打月若作世諦流布
接竹點天畢竟合作麼生師子巖有個焦尾大蟲夜
來惡發被山僧劈脊一棒化爲微塵却借陳如尊者
四大五蘊以爲出入游戲之具你一隊瞋睡漢驢年
也未夢見在喝一喝下座

上堂舉風穴和尚因真園頭同念法華問訊次穴問
真云如何是世尊不說說迦葉不聞聞真云鶉鳩樹
上啼穴云你作許多癡福作麼何不體究言句又問
念法華云你作麼生念云動容揚古路不墮悄然機
穴却顧真園頭云你何不看念法華下語念自茲印
可名振四方師云山僧昔年侍立先師次亦嘗被問
此話擬下語間遂遭一頓熱棒打出直得三日忍痛
不已大眾端的要見一老優劣但將妙上座吃棒處
看

雪巖和尚忌拈香巴陵設忌二轉語西峰單單只一

句且道是那一句聾遂插香云逢人切忌錯舉
上堂舉凌行婆問浮杯盡力道不得底句分付阿誰
杯云浮杯無剩語婆云未到浮杯不妨疑著杯云更
有長處不妨拈出婆斂手哭云蒼天中更添怨苦杯
無語婆云語不知偏正理不識倒邪 則禍生後
有僧舉似南泉泉云苦哉浮杯被遮老婆摧折一上
婆聞得笑云王老師猶少機關在時有幽州澄一禪
客詣婆乃問南泉爲甚少機關婆哭云可悲可痛澄
一罔措婆云會麼一合掌而立婆云跋死禪和如麻
似粟後澄一舉似趙州州云我若見遮臭老婆問教

伊口啞一云未審和尚作麼生問伊州便打一云爲
甚却打某甲州云似遮般跋死禪和不打更待何時
婆聞却云趙州合吃婆手中棒州聞得哭云可悲可
痛婆聞乃歎云趙州眼光燦破四天下州聞得令人
去問云如何是趙州眼婆乃豎起拳僧回舉似趙州
州乃有頌與婆云當機覲面提覲面當機疾報爾凌
行婆哭聲何得失婆有頌答云哭聲師已曉已曉復
誰知當時摩竭令幾喪目前機師拈云山僧始者一
看將謂總是白拈賊及乎再辨端倪却有浮杯較些
子何故不因漁父引爭得見波濤

佛誕上堂指天指地一棒打殺鳩屎砒霜合造毒藥
颺在三千世界中不知那個親遭著卓拄杖一下
結制上堂西峰結制不尋常殺滿倉兮僧滿堂既得
遮些根蒂固大家搖扇取風涼

上堂門外有一人用盡機謀要入人不得門裏有一
人做盡伎倆要出出不得入不得入不得即且置且
道門外人與門裏人相見時如何愁人莫向愁人說
說向愁人愁殺人

開爐上堂三千世界作爐百億須彌爲炭生鐵鑄就
禪和炙得通身紅爛正恁麼時莫有躡得過底麼左
右顧視云噯將謂水不能溺火不能焚元來總是一
隊爛額焦頭漢

上堂十五日已前毵毵毵魁魁魁十五日已後
巍巍堂堂焯焯焯正當十五日虛空爲鼓須彌爲
槌輕輕擊動佛祖攢眉卽今莫有解擊底麼以拂子
擊禪床云若將耳聽應難會眼處聞聲方始知

薦亡上堂入我法中不論凡聖動轉施爲咸遵舊令
要明少室格外新條驀拈拄杖云未免借伊鼻孔出
氣卓拄杖云開甘露門劃一畫云示甘露味大地衆
生頓超十地惟有今辰覺成上座營齋報薦考妣二

位亡靈不在其內何故擲拄杖云分明一對黃金骨
不必旃檀入細雕

畱兩班上堂九旬把定重關今朝放開一線頂門具
眼衲僧自合知機識變乃展手云依舊平分局面
復舉靈雲見桃花悟道刺腦入膠盆瀉山道從緣入
者永無退失咬牙封雍齒玄沙道諦當甚諦當敢保
老兄未徹在位淚斬丁公伶俐漢直饒向遮裏見得
更買草鞋行脚三十年却來吃西峰痛棒

上堂一不成二不是紅底桃白底李紅紅白白不相
瞞因甚達磨大師被流支三藏打落當門齒

通寧智顏菴主送法被至上堂裁蜀錦剪吳綾披白
玉間黃金打成一片時針劄不入羅紋結角處線路
難尋雖然只如西峰以諸法空爲座以拄杖指被云
還著得遮箇麼靠拄杖云天香影散莓苔石五葉花
開簷蔔林

結制上堂一百禪和三十州無繩自縛萬山頭誰是
護生誰是殺白雲影裏鐵船浮

上堂舉雪峰因僧來叅峰問甚處來僧云浙中來峰
云船來陸來僧云二途俱不涉峰云爭得到遮裏僧
云有甚麼隔礙峰打趂出僧後十年再來峰云甚處

來僧云湖南來峰云湖南與此間相去多少僧云不
隔峰舉拂云還隔遮箇麼僧云若隔爭得到遮裏峰
亦打出僧住後每見人必罵雪峰同行聞特去相訪
遂問你因甚罵雪峰遮僧舉前兩段因緣同行痛罵
與伊點破遮僧遂悲泣每於中夜焚香望雪峰禮拜
師拈云遮箇公案頗類德山托鉢話諸方商量者極
多錯會者亦不少具眼底但於德山低頭處見得便
會雪峰打意於巖頭不肯處見得便會遮僧罵意又
於巖頭密啓處見得便會同行點破意於巖頭撫掌
處見得便會遮僧悲泣意又於巖頭受記處見得便

會遮僧遙禮意西峰今日將二老父子縛作一
束拋在諸人面前了也諸人要見二老則易要見西
峰則難何故有眼無耳塚六月火邊坐

晚叅萬法歸一一歸何處狹路相逢兩手分付違得
便行黃河三千年一度清

上堂意句不到宗說不通盲龜跛鼈意句俱到宗說
俱通盲龜跛鼈西峰恁麼告報莫有離此之外別有
生涯底麼盲龜跛鼈

佛誕上堂呱聲未絕便稱尊攪得三千海嶽昏惡水
一年澆一度知他雪屈是酬恩

妙湛無爲長老至上堂舉劉鐵磨來叅瀉山把髻投
衙山云老特牛汝來也引狗入寨磨云來日臺山大
會有齋和尚還去麼癩兒牽伴瀉山作臥勢隨邪逐
惡磨便出咄直饒追得便行也是韓獪逐塊

冬至舉僧問古德云一陽來復日長一線未審佛法
長多少德云長一線後又有古德云一線長師拈云
就窠打劫還他二老本分鉗鎚若謂佛法短長端的
未夢見在今日忽有人問西峰佛法長多少只向他
道東西十萬南北八千

薊林居士至上堂此事如欲登天目大山相似未到

山時不免蘊一座山於八識田中洎至一到所蘊之
山恍焉消殞因甚如此豎起拂子云只緣身在此山
中

復舉老子道湛兮似或存吾不知其誰之子象帝之
先師拈云咄哉遮漢錯下注脚湛兮似或存吾不知
其誰之子毘耶城裏老維摩

上堂舉雲門大師到乾峰云請師答話含血噴人先
污其口峰云到老僧也未赤眼撞著火柴頭門云恁
麼那恁麼那河裏失錢河裏拖峰云將謂猴白更有
猴黑好手手中呈好手紅心心裏中紅心

雪巖和尚拈香阿師示寂來彈指恰八載將謂入
黃泉面目儼然在大衆面目旣在拈起香云莫是遮
箇麼插香云認著依前猶隔海

上堂工夫不到不方圓寬著程途急著鞭但得此心
常不昧從教滄海變桑田

解制上堂識得拄杖子被拄杖子縛不識拄杖子亦
被拄杖子縛卓拄杖云不是弄潮人徒勞遭點額

復舉金陵則監寺初叅青峰問云如何是學人自己
峰云丙丁童子來求火後謁法眼眼云曾見甚麼人
來則云青峰來眼云有何言句則舉前話眼云上座

作麼生會則云丙丁屬火以火覓火如將自己覓自
己眼云恁麼會又爭得則云某甲只恁麼和尚作麼
生眼云汝問我我與汝道則云如何是學人自己眼
云丙丁童子來求火則於言下頓悟師拈云遮則公
案自古至今覓箇不錯會底人如星中揀月相似只
如則監寺於法眼言下悟去要且不是順朱具眼底
試辨看

重陽上堂大抵登高直須親到萬山之頂若不到頂
爭知宇宙之寬卽今莫有到頂底麼良久云土曠人
稀相逢者少

復舉慈明和尚每室中以水一盆上劄一口劔下著
一綉草鞵膝上橫按拄杖凡有僧入門便指纔擬便
棒師拈云大小慈明勞而無功西峰不動一鎗一旗
從教是短鶴長何故年年九月九遍地菊花香

上堂舉永首座同慈明辭汾陽後相從二十年不得
休歇一夕圍爐夜深明以火筋敲炭召云永首座永
首座永咄云野狐精明以手指云訝郎當漢又恁麼
去永於言下頓悟師拈云遮箇公案若曰依條直斷
慈明無端坑陷平人合吃三十棒永首座不合隨風
倒拖亦當代吃十棒忽有箇抱不平底出來道西峰

澗則向他道心不負人面無慚色

雪巖和尚忌拈香咄哉老賊偷心未息石灰布袋到
處成跡若謂子爲父隱畢竟曲不藏直今日因齋慶
讚未免乘時拈出

上堂一年又過一月今日又從頭起循環烏兔如梭
百歲光陰有幾以拄杖卓一下云諸上座休瞋睡直
饒火急翻身四大海水早已傾在汝耳裏

結制上堂今年龍象頗多權作三堂結夏雖然名字
不同是法本無高下中間有箇肉身菩薩現與諸人
同結同修同眠同坐若也點檢得出說甚黃面瞿曇

西來達磨不然且待七月十五却與諸人說破
後舉僧問雲門如何是諸佛出身處門云東山水上
行又僧問圓悟如何是諸佛出身處悟云薰風自南
來殿閣生微涼師拈云二老雖具頂門正眼恣其本
源天地懸隔

上堂資生貴圖求富叅禪貴圖求悟求悟若學資生
箇箇成佛作祖咄甜瓜徹蒂甜苦瓠連根苦

復舉僧於馬祖前作四畫上一畫長下二畫短云不
得道長不得道短離四句答某甲始得祖乃畫一畫
云不得道長不得道短答汝了也後僧舉似忠國師

師云何不問我師拈云字經三寫烏焉成馬西峰忍
俊不禁特爲諸人改正去也召侍者云分明記取

上堂舉僧問長慶衆手淘金誰是得者慶云有伎倆
者得僧云學人還得也無慶云大遠在師拈云西峰
不然今日忽有人問衆手淘金誰是得者只向他道
阿誰無分又云學人還得也無猶少在

上堂千疑萬疑祇是一疑若能決此一疑免教節上
生枝卽今莫有決得底麼若也決得賞你一錠金若
決不得亦賞你一錠金何故豈不見道至道無難惟
嫌揀擇

復舉僧問法眼聲色二字如何透得法眼召大眾云
若會得遮僧問處透聲色也不難師拈云明修棧道
暗度陳倉

解制上堂拈拄杖卓一下云打開布袋頭放出百千
牛縱隨芳草去終不被人收一日歸來重會面半含
容笑半含羞大眾羞卽且止畢竟笑箇甚麼又卓一
下云休

復舉芙蓉一日告辭馬祖祖云裝却包了來與你說
一上佛法芙蓉於次日至方丈侍立少頃祖云時寒
善爲道路芙蓉至法堂上忽然有省師拈云馬祖佛

法恁麼流布拈花微笑命若懸絲今日凡有人來告
辭總與草鞵一緇

上堂今朝八月一行脚禪和出不識自家珍却向途
中覓直饒走遍二百一十城叅見五十三善知識功
超十地三乘位等釋迦彌勒若還來到西峰未免一
棒打折你驢脊

起期上堂山僧久病服藥不瘳大眾久叅於心不悟
所以病到筋斷骨折處叅到情窮理極時一一檢點
將來全無些子靈驗記得去年有一則未了公案今
日擬循舊例別拈新條以八十日割地爲牢要諸人

各各通箇口款不得將無作有不得指東話西不得舉意博量不得擬心湊泊若有箇不顧性命底漢向事未著罪未彰以前一款盡招西峰拄杖子當爲伊據款結案

辭衆西峰三十年妄談般若罪犯彌天末後有一句子不敢累及平人自領去也大眾還有知落處者麼良久云毫釐有差天地懸隔

△示禪人

三世諸佛歷代祖師畱下一言半句惟務衆生超越三界斷生死流故云爲一大事因緣出現於世若論此一大事如馬前相撲又如電光影裏穿針相似無你思量解會處無你計較分別處所以道此法非思量分別之所能解是故世尊於靈山會上臨末稍頭將三百六十骨節八萬四千毛竅盡底掀翻雖有百萬衆圍繞承當者惟迦葉一人而已信知此事決非草草若要的實明證須開特達懷發丈夫志將從前惡知惡解奇言妙句禪道佛法盡平生眼裏所見底

耳裏所聞底莫顧危亡得失人我是非到與不到徹
與不徹發大忿怒奮金剛利刃如斬一握絲一斬一
切斷一斷之後更不相續直得胸次中空勞勞地虛
豁豁地蕩蕩然無絲毫許滯礙更無一法可當情與
初生無異吃茶不知茶吃飯不知飯行不知行坐不
知坐情識頓淨計較都忘恰如箇有氣底死人相似
又如泥塑木雕底相似到遮裏驀然脚蹉手跌心華
頓發洞照十方如杲日麗天又如明鏡當臺不越一
念頓成正覺非惟明此一大事從上若佛若祖一切
差別因緣悉皆透頂透底佛法世法打成一片騰騰

任運任運騰騰洒洒落落乾乾淨淨做一箇無爲無
事出格真道人也恁麼出世一番方曰不負平生叅
學之志願耳若是此念輕微志不猛利趔趔趔趔
颺颺今日也恁麼明日也恁麼設使三十年二十
年用工一如水浸石頭相似看看逗到臘月三十日
十個有五雙慳懼而去致令晚學初機不生敬慕似
遮般底漢到高峰門下打殺萬萬千千有甚麼罪過
今日我之一衆莫不皆是俊鷹快鶴如龍若虎舉一
明二目機鉢兩豈肯作遮般體態兀兀度時然雖如
是正恁麼時畢竟喚甚麼作一大事若也道得與汝

三十拄杖若道不得亦與三十拄杖何故卓拄杖一
下云高峰門下賞罰分明

兄弟家十年二十年以至一生絕世忘緣單明此事
不透脫者病在於何本分衲僧試拈出看莫是宿無
靈骨麼莫是不遇明師麼莫是一暴十寒麼莫是根
劣志微麼莫是汨沒塵勞麼莫是沉空滯寂麼莫是
雜毒入心麼莫是時節未至麼若論膏肓之疾總不
在遮裏既不在遮裏畢竟在甚麼處咄三條椽下七
尺單前

若論此事如火聚烈焰巨天曾無少間世間所有
之物悉皆投至猶如片雪點著便消爭容毫末若能
恁麼提持尅日之功萬不失一儻不然者縱經塵劫
徒受勞矣

若論此一段奇特之事人人本具箇箇圓成如握拳
展掌渾不犯纖毫之力祇為心猿擾擾意馬喧喧恣
縱二毒無明妄執人我等相如水澆水愈加濃厚障
却自已靈光決定無由得現若是生鐵鑄就底漢的
實要明亦非造次直須發大志立大願殺却心猿意
馬斷除妄想塵勞如在急水灘頭泊舟相似不顧危
亡得失人我是非忘寢忘食絕思絕慮晝三夜三心

心相次念念相續剗定脚頭咬定牙關牢牢把定繩頭更不容絲毫走作假使有人取你頭除你手足剗你心肝乃至命終誠不可捨到遮裏方有少分做工夫氣味嗟乎末法去聖時遙多有一等泛泛之流竟不信有悟門但只向遮邊穿鑿那邊計較直饒計較得成穿鑿得就眼光落地時還用得著也無若用得著世尊雪山六年達磨少林九載長慶坐破七箇蒲團香林四十年方成一片趙州三十年不雜用心何須討許多生受吃更有一等成十年二十年用工不曾有箇入處者只爲他宿無靈骨志不堅固半信半

疑或起或倒弄來弄去世情轉轉純孰道念漸漸生疎十二時中難有一箇時辰把捉得定打成一片似遮般底直饒弄到彌勒下生也有甚麼交涉若是真正本色行脚高士不肯胡亂打頭便要尋個作家纔聞舉著一言半句更不擬議直下便恁麼信得及作得主把得定孤迥迥峭巍巍淨裸裸赤洒洒更不問危亡得失只恁麼捱將去驀然繩斷吃顛絕後再甦看他本地風光何處更覓佛矣又有一偈舉似大眾急水灘頭泊小舟切須牢把遮繩頭驀然繩斷難迴避直得通身血迸流

生死事大無常迅速生不知來處謂之生大死不知去處謂之死大只遮生死一大事乃是叅禪學道之喉襟成佛作祖之管轄三世如來恒沙諸佛千變萬化出現世間蓋爲此生生死一大事之本源西天四七唐土二三以至天下老和尚出沒卷舒逆行順化亦爲此一大事之本源諸方禪衲不憚勞苦三十年二十年撥草瞻風磨硯擦袴亦爲此一大事之本源汝等諸人發心出家發心行脚發心來見高峰晝三夜三眉毛厮結亦爲此一大事之本源四生六道千劫萬劫改頭換面受苦受辛亦是迷此一大事之本源

吾佛世尊捨金輪王位雪山六年苦行夜半見明星悟道亦是悟遮一大事之本源達磨大師入此土來少林面壁九載神光斷臂於覓心不可得處打失鼻孔亦是悟遮一大事之本源臨濟遭黃蘗六十痛棒向大愚肋下還拳亦是悟遮一大事之本源靈雲桃花香嚴擊竹長慶捲簾玄沙墜指乃至從上知識有契有證利生接物總不出悟遮一大事之本源多見兄弟家雖曰入此一門往往不知學道之本源不能奮其志因循度日今來未免葛藤引如上佛祖入道之因及悟道之由以爲標格晚學初機方堪趣向且

道如何趣向不見古人道若要脫生死須透祖師關
畢竟將甚麼作關喚作竹篋則觸不喚作竹篋則背
不得有語不得無語若向遮裏著得一隻眼覷得破
轉得身通得氣無關不透無法不通頭頭示現物物
全彰無邊刹境自他不隔於毫端十世古今始終不
離於當念所以水潦和尚見馬大師禮拜起擬伸問
間被馬祖攔胸一脚踏倒起來呵呵大笑云百千法
門無量妙義總向一毫頭上識得根源去德山見龍
潭向吹滅紙燭處豁然大悟次日遂將疏鈔於法堂
上焚云窮諸玄辨若一毫置於太虛竭世樞機似一

滴投於巨壑到遮裏有甚麼禪道可叅有甚麼佛法
可學有甚麼生死可脫有甚麼涅槃可證騰騰任運
任運騰騰臘月三十日到來管取得大自在去住自
由故云自從認得曹溪路了知生死不相干然雖如
是豎拂子云且道遮箇是生耶是死耶若也道得便
可向無佛處稱尊無法處說法其或未然山僧不懼
羞慚更與諸人露箇消息擲下拂子云夜冷魚潛空
下釣不如收卷過殘年

兄弟家成十年二十年撥草瞻風不見佛性往往皆
謂被昏沉掉舉之所籠罩殊不知只遮昏沉掉舉四

字當體卽是佛性堪嗟迷人不了妄自執法爲病以病攻病致使佛性愈求愈遠轉急轉遲設使一箇半箇回光返照直下知非廓然藥病兩忘眼睛露出洞明達磨單傳徹見本來佛性若據西峰點檢將來猶是生死岸頭事若曰向上一路須知更在青山外若論此事正如逆水撐船上得一篙退去十篙上得十篙退去百篙愈撐愈退退之又退直饒退到大洋海底撥轉船頭決欲又要向彼中撐上若具遮般操志卽是到家消息如人上山各自努力

若論此事如萬丈深潭中投一塊石相似透頂透底了無絲毫間隔誠能如是用工如是無間一七日中若無倒斷妙上座永墮阿鼻地獄

法門廣無邊叅禪第一義若真師子兒不入他羣隊直下便翻身異獸皆迴避毘盧頂上行生死海中戲佛祖不知名衆魔爭敢邇奇哉此妙門寂寞無人思若有發初心須具大根器內外絕諸緣屏心立堅志譬如人架屋先須實基址基實屋無傾志堅道成易提箇趙州無截斷有無意豎起鐵脊梁急著眼睛覷密密與綿綿絲毫無間棄譬如人倒懸念念更無異日夜苦思量一心求脫離不分東與西寢食都忘記

又如初生兒呼喚渾不視用工到那時如人鑽火燧
漸見黑黃烟知火必在此切莫顧危亡更須加猛利
直待火星飛通身是焰熾余雖不會禪也會恁麼試
只在刹那間可立而待至頂門眼豁開裂破娘生鼻
海竭須彌崩虛空撲落地十方賢聖師盡是眼中刺
微笑與拈花可煞不知愧更有葛藤根一千七百事
嗚呼後代人盡食他殘體若更問如何拳頭劈口捶
十二時中四威儀內寶劍全提如臨大陣纔有絲毫
念起當急剉之一斷永斷莫令再續若能如是用工
管取干戈永息天下太平有志之士思之遵之夜後

叅前遞相警勵

此事的要尅日成功如善射者仰箭射空復以後箭
射前箭筈筈承箭箭箭中筈首尾相資上下貫串
住於空中經久不墮蓋是精進之功決非神力所致
凡學般若菩薩亦復如是汝等應當精進如彼射空
正恁麼時莫有善射底麼以拂作彎弓勢云看箭
叅禪一著莫遲疑念念如同救火時烈焰亘天渾不
顧翻身直造萬重圍一朝火滅烟消後鼻孔依前向
下垂

如人負重過急流溪行至中間忽遇黑風暴雨其水

愈急其水愈深退亦不能進亦不能擬議之間喪身
失命正恁麼時合作麼生叅

若論叅禪之要不可執蒲團爲工夫墮於昏沉散亂
中落在輕安寂靜裏總皆不覺不知非惟虛喪光陰
難消施主供養一朝眼光落地之時畢竟將何所靠
山僧昔年在衆除二時粥飯不會上蒲團只是從朝
至暮東行西行步步不離心心無間如是經及三載
會無一念懈怠心一日驀然踏著自家底元來寸步
不會移

若謂著實叅禪決須具足三要第一要有大信根明
知此事如靠一座須彌山第二要有大憤志如遇殺
父冤讐直欲便與一刀兩段第三要有大疑情如暗
地做了一件極事正在欲露未露之時十二時中果
能具此三要管取尅日成功不怕甕中走鼈苟闕其
一譬如折足之鼎終成廢器然雖如是落在西峰坑
子裏也不得不救咄

若論此事無尊無卑無老無少無男無女無利無鈍
故我世尊於正覺山前臘月八夜見明星悟道乃言
奇哉衆生具有如來智慧德相又云心佛及衆生是
三無差別又云是法平等無有高下既無差別亦無

高下從上佛祖古今知識乃至天下老和尚有契有證有遲有速有難有易畢竟如何譬如諸人在此各各有箇家業驀然一日回光返照思憶還原或有經年而到者或有經月而到者或有經日而到者或有頃刻而到者又有至死而不到者蓋離家有遠近之殊故到有遲速難易之別然雖如是中間有箇漢子無家業可歸無禪道可學無生死可脫無涅槃可證終日騰騰任運任運騰騰若他點檢得出釋迦彌勒與你提瓶挈鉢亦不爲分外苟或不然亦佛子擊禪牀兩下喝兩喝云若到諸方忌錯舉

此事譬如人家屋簷頭一堆榼搔相似從朝至暮雨打風吹直是無人覷著殊不知有一所無盡寶藏蘊在其中若也拾得百劫千生取之無盡用之無竭須知此藏不從外來皆從你諸人一箇信字上發生若信得及决不相誤若信不及縱經塵劫亦無是處普請諸人便恁麼信去免教做箇貧窮乞兒且道此藏卽今在甚處良久云不入虎穴爭得虎子萬法歸一一何歸只貴惺惺著意疑疑到情忘心絕處金烏夜半徹天飛

若窮此事用工極際正如空裏栽花月中撈月直是

無你下手處無你用心處往往纔遇避境界現前十
箇有五雙打退鼓殊不知正是到家底消息若是孟
八郎漢便就下手不得處用心不及時猶如關羽百
萬軍中不顧得喪直取顏良誠有如是操畧如是猛
利管取彈指收功剎那成聖若不然者饒你參到彌
勒下生也只是箇張上座

有時熱鬧闐有時冷冰冰有時如牽驢入井有時如
順水張帆因此四魔更相殘害致使學人忘家失業
西峰今日畧施一計要與諸人掃蹤滅跡良久云捷
若論此事如登萬仞之山一步一步將搆至頂惟有

數步壁絕攀躋到遮裏須是箇純鋼打就底捨命拚
身左捱右捱捱來捱去以上爲期縱經千生萬劫萬
難千魔此心此志愈堅愈強若是根本不實泛泛之
徒何止望崖管取聞風而退矣

示直翁居士終日共談不二未嘗舉著一字復問此
意如何不免遞相鈍置父母非我親誰是最親者盲
龜跛鼈靈利漢向遮裏薦得便見無邊剎境自他不
隔於毫端十世古今始終不離於當念其或未然不
妨撇轉機輪便就盲龜跛鼈上著些精彩起箇疑情
疑來疑去直教內外打成一片終日無絲毫滲漏鯁

鯁于懷如中毒藥相似又若金剛圈栗棘蓬決定要
吞決定要透但盡平生伎倆憤將去自然有箇悟處
假使今生吞透不下眼光落地之時縱在諸惡趣中
不驚不怖無拘無絆設遇閻家老子諸大鬼王亦皆
拱手何故蓋爲有此般若不思議之威力也然則有
諸現業畢竟般若力勝如箇金剛幢子鑽之不入撼
之不動世人出於毫勢門墻亦復如是一切官屬吏
卒無不畏之又若擲物墮地重處先著目卽雖有成
住壞空之相如龍脫殼如客旅居其實本主無生無
滅無去無來無增無減無老無少自無始以來至於

今生頭出頭沒千變萬化未嘗移易絲毫許堪嗟一
等學人往往多認遮箇識神不求正悟不脫生死置
之莫論今生既下此般若種子纔出頭來管取福慧
兩全超今越古裴相國李駙馬韓文公白樂天蘇東
坡張無盡卽此之類也雖沉迷欲境亦不會用工纔
叅見善知識一言之下頓悟上乘超越生死雖在塵
中游戲三昧不忘佛囑外護吾門咸載祖燈續佛慧
命此等若不是宿世栽培焉得便恁麼開花結子福
足慧足是則固是今日山僧却有箇煨凡成聖底藥
頭不假栽培底種子說則辭繁畧舉一偈欲明種子

因熟讀上大人若到可知禮盲龜跛鼈親

示淨修侍者予假此來二十四年常在病中求醫服藥歷盡萬般艱苦爭知病在膏肓無藥可療後至雙徑夢中服斷橋和尚所授之丹至第六日不期觸發仰山老和尚所中之毒直得冤飛膽喪絕後再甦當時便覺四大輕安如放下百二十斤一條檐子相似今將此丹授之於汝汝欲服之先將六情六識四大五蘊山河大地萬象森羅總鎔作一箇疑團頓在目前不假一鎗一旗靜悄悄地便似箇清平世界如是行也只是箇疑團坐也只是箇疑團著衣吃飯也只

是箇疑團屙屎放尿也只是箇疑團以至見聞覺知總只是箇疑團疑來疑去疑至省力處便是得力處不疑自疑不舉自舉從朝至暮粘頭綴尾打成一片無絲毫縫罅撼亦不動趨亦不去昭昭靈靈常現在前如順水流舟全不犯手只此便是得力底時節也更須慙其正念慎無二心展轉磨光展轉淘汰窮玄盡與至極至微向一毫頭上安身孤孤迥迥卓卓巍巍不動不搖無來無去一念不生前後際斷從茲塵勞頓息昏散勦除行亦不知行坐亦不知坐寒亦不知寒熱亦不知熱吃茶不知茶吃飯不知飯終日默

惵惵地恰似箇泥塑木雕底故謂牆壁無殊纔有遮
境界現前卽是到家之消息也決定去他不遠也巴
得構也撮得著也只待時刻而已又却不得見恁麼
說起一念精進心求之又却不得將心待之又却
得要一念縱之又却不得要一念棄之直須堅凝正
念以悟爲則當此之際有八萬四千魔軍在汝六根
門頭伺候所有一切奇異殊勝善惡應驗之事隨汝
心設隨汝心生隨汝心求隨汝心現凡有所欲無不
遂之汝若瞥起毫釐差別心擬生纖塵妄想念卽便
墮他圈積卽便被他作主卽便聽他指揮便乃口說

魔話心行魔行反誹他非自譽真道般若正因從茲
永泯菩提種子不復生芽劫劫生生常爲伴侶當知
此諸魔境皆從自心所起自心所生心若不起爭如
之何天台云汝之伎倆有盡我之不采無窮誠哉是
言也但只要一切處放教冷水冰地去平妥妥地去
純清絕點去一念萬年去如箇守屍鬼子守來守去
疑團子欵然爆地一聲管取驚天動地勉之勉之
示信翁居士大抵叅禪不分縑素但只要一箇決定
信字若能直下信得及把得定作得主不被五欲所
撼如箇鐵橛子相似管取尅日成功不怕甕中走鼈

豈不見華嚴會上善財童子歷一百一十城叅五十
三善知識獲無上果亦不出遮一箇信字法華會上
八歲龍女直往南方無垢世界獻珠成佛亦不出遮
一箇信字涅槃會上廣額屠兒颺下屠刀唱言我是
千佛一數亦不出遮一箇信字昔有阿那律陀因被
佛訶七日不睡失去雙目大千世界如觀掌果亦不
出遮一箇信字復有一少比丘戲一老比丘與證果
位遂以皮球打頭四下卽獲四果亦不出遮一箇信
字楊岐叅慈明和尚令充監寺以至十載打失鼻孔
道播天下亦不出遮一箇信字從上若佛若祖超登

彼岸轉大法輪接物利生莫不皆由此一箇信字中
流出故云信是道元功德毋信是無上佛菩提信能
永斷煩惱本信能速證解脫門昔有善星比丘侍佛
二十年不離左右蓋謂無此一箇信字不成聖道生
陷泥犁今日信翁居士雖處富貴之中能具如是決
定之信昨於壬午歲登山求見不納而回又於次年
冬拉直翁居士同訪始得入門今又越一載齋糧裹
糝特來相從乞受毘尼願爲弟子故以連日詰其端
由的有篤信趣道之志維摩經云高原陸地不生蓮
華卑濕淤泥乃生此華正謂此也山僧由是撫之將

箇省力易修會驗底話頭兩手分付萬法歸一一歸何處決能便恁麼信去便恁麼疑去須知疑以信爲體悟以疑爲用信有十分疑有十分疑得十分悟得十分譬如水漲船高泥多佛大西天此土古今知識發揚此段光明莫不只是一箇決疑而已千疑萬疑只是一疑決此疑者更無餘疑旣無餘疑卽與釋迦彌勒淨名龐老不增不減無二無別同一眼見同一耳聞同一受用同一出沒天堂地獄任意逍遙虎穴魔宮縱橫無礙騰騰任運任運騰騰故涅槃經云生滅滅已寂滅爲樂須知此樂非妄念遷注情識之樂

乃是真淨無爲之樂耳夫子云夕死可矣顏回不改其樂曾點舞詠而歸咸佩此無生真空之樂也苟或不疑不信饒你坐到彌勒下生也只得箇依草附木之精靈覓不散底死漢教中言一乘小果雖入八萬劫大定不信此事去聖逾遙常被佛訶直欲發大信起大疑疑來疑去一念萬年萬年一念的的要見遮一著子下落如與人結了生死冤讐相似心憤憤地卽欲便與一刀兩段縱於造次顛沛之際皆是猛利著鞭之時節若到不疑自疑寤寐無失有眼如盲有耳如聾不墮見聞窠臼猶是能所未忘偷心未息

切宜精進中倍加精進直教行不知行坐不知坐東西不辨南北不分不見有一法可當情如箇無孔鐵錘相似能疑所疑內心外境雙亡雙泯無無亦無到遮裏舉足下足處切忌踏翻大海踢倒須彌折旋俯仰時照顧觸達磨眼睛磕破釋迦鼻孔其或未然更與添箇注脚僧問趙州萬法歸一一歸何處州云我在青州作一領布衫重七斤師云大小趙州拖泥帶水非特不能爲遮僧斬斷疑情亦乃賺天下衲僧死在葛藤窠裏西峰則不然今日忽有人問萬法歸一一歸何處只向他道狗舐熱油鐺信翁信翁若向

遮裏擔荷得去只遮一箇信字也是眼中著屑示理通上人大抵學人打頭不遇本分作家十年二十年遮邊那邊或叅或學或傳或記殘羹餽飯惡知惡覺尖尖滿滿築一肚皮正如箇臭糟瓶相似若遇箇有鼻孔底聞著未免惡心嘔吐到遮裏設要知非悔過別立生涯直須盡底傾出三回四回洗七番八番泡去教乾乾淨淨無一點氣息般若靈丹方堪趣向若是忽忽草草打屏不乾縱盛上品醍醐亦未免變作一瓶惡水且道利害在甚麼處咄毒氣深入答直翁居士書來書置問皆是辨論學人用工上疑

惑處當爲決之俾晚學初機趣向無滯問平常心是道無心是道此平常心無心之語成却多少人誤却多少人往往不知泥中有刺笑裏有刀者何啻有掉棒打月接竹點天古人答一言半句如揮吹毛利刃直欲便要斷人命根若是箇皮下有血底直下承當更無擬議若撞著箇不知痛痒底縱饒髑髏徧地也乾沒星子事又如石中藏玉識者知有連城之璧不識者只作一塊頑石視之大抵要見古人立地處不可向語向上著到且道既不在語向上畢竟在甚處著到若向遮裏薦得便知此事不假修治如身

使臂如臂使拳極是成現極是省力但信得及便是何待瞪眉豎目做模打樣看箇一字儻或不然古云莫道無心云是道無心猶隔一重關何止一重更須知有百千萬重在苟不發憤志精進下一段死工夫豈於木石之有異乎凡做工夫到極則處必須自然入於無心三昧却與前之無心天地相遼達磨云心如墻壁夫子三月忘味顏回終日如愚賈島取捨推敲此等卽是無心之類也到遮裏能舉所舉能疑所疑雙忘雙泯無無亦無香嚴聞聲靈雲見色玄沙掣指長慶捲簾莫不皆由此無心而悟也到遮裏設有

毫釐待悟心生纖塵精進念起卽是偷心未息能所未忘此之一病悉是障道之端也若要契悟真空親到古人地位必須真正至於無心三昧始得然此無心汝譬頗明吾復以偈證之不得遮箇爭得那箇既得那箇忘却遮箇然雖如是更須知道遮箇那箇總是假箇的的真底聾咄陽焰空華

通仰山雪巖和尚疑嗣書昔年敗闕親曾剖露師前今日重疑不免從頭拈出某十五歲出家十六爲僧十八習天台教二十更衣入淨慈立三年死限學禪遂請益斷橋和尚令參生從何來死從何去於是意

分兩路心不歸一又不曾得斷橋和尚說做工夫處分曉看看擔閣一年有餘每日只如箇迷路人相似那時因被三年限逼正在煩惱中忽見台州淨兄說雪巖和尚常問你做工夫何不去一轉於是欣然懷香詣北磻塔頭請益方問訊插香被一頓痛拳打出卽關却門一路垂淚回至僧堂次日粥罷復上始得親近卽問已前做處某一一供吐當下便蒙勦除日前所積之病却令看箇無字從頭開發做工夫一遍如暗得燈如懸得救自此方解用工處又令日日上來一轉要見用工次第如人行路日日要見工程不

可今日也恁麼明日也恁麼每日纔見入來便問今日工夫如何因見說得有緒後竟不問做處一入門便問阿誰與你拖遮死屍來聲未絕便以痛拳打出每日但只恁麼問恁麼打正被逼拶有些涯際值老和尚赴南明請臨行囑云我去入院了却令人來取你後竟絕消息卽與常州澤兄結伴同往至俗親處整頓行裝不期俗親念某等年幼又不曾涉途行李度牒總被收却時二月初諸方掛塔皆不可討不免挑包上徑山二月半歸堂忽于次月十六夜夢中忽憶斷橋和尚室中所舉萬法歸一一歸何處話自此

疑情頓發打成一片直得東西不辨寢食俱忘至第六日辰巳間在廊下行見衆僧堂內出不覺輒於隊中至三塔閣上諷經擡頭忽覩五祖演和尚眞贊末後兩句云百年三萬六千朝返覆元來是遮漢日前被老和尚所問拖死屍句子驀然打破直得覓飛騰喪絕後再甦何啻如放下百二十斤擔子乃是辛酉三月廿二少林忌日也其年恰廿四歲滿三年限便欲造南明求決那堪逼夏諸鄉人亦不容直至解夏方到南明納一場敗闕室中雖則累蒙煖煉明得公案亦不受人瞞及乎開口心下又覺得渾了於日用

中尚不得自由如欠人債相似正欲在彼終身侍奉
不料同行澤兄有他山之行遽違座下至乙丑年老
和尙在道場作掛牌時又得依附隨侍赴天寧中間
因被詰問日間浩浩時還作得主麼答云作得主又
問睡夢中作得主麼答云作得主又問正睡著時無
夢無想無見無聞主在甚麼處到遮裏直得無言可
對無理可伸和尙却囑云從今日去也不要你學佛
學法也不要你窮古窮今但只饑來吃飯困來打眠
纔眠覺來却抖擻精神我遮一覺主人公畢竟在甚
處安身立命雖信得及遵守此語奈資質遲鈍轉見

難明遂有龍鬚之行卽自誓云拚一生做個癡狀漢
定要見遮一著子明白經及五年一日寓菴宿睡覺
正疑此事忽同宿道友推枕子墮地作聲驀然打破
疑團如在網羅中跳出追憶日前所疑佛祖誦訛公
案古今差別因緣恰如泗州見大聖遠客還故鄉元
來只是舊時人不改舊時行履處自此安邦定國天
下太平一念無爲十方坐斷如上所供並是詣實伏
望尊慈特垂詳覽

室中垂語大徹底人本脫生死因甚命根不斷△佛
祖公案只是一箇道理因甚有明與不明△大修行

人當遵佛行因甚不守毘尼△杲日當空無所不照因甚被片雲遮却△人人有箇影子寸步不離因甚踏不著△盡大地是箇火坑得何三昧不被燒却普說尋常教人做工夫看箇萬法歸一一歸何處公案看時須是發大疑情世間一切萬法總歸一法畢竟歸在何處向行住坐臥處著衣吃飯處屙屎放尿處抖擻精神急下手脚但恁麼疑畢竟一歸何處決定要討箇分曉不可捉在無事界裏不可胡思亂想須要綿綿密密打成一片直教如大病一般吃飯不知飯味吃茶不知茶味如癡如呆東西不辨南北不

分工夫做到遮裏管取心華發明悟徹本來面目生死路頭不言可知須要世間情念放教輕微道念自然濃厚古人云生處要熟熟處要生閑時不要看經消遣工夫不得成一片只要起身行道急著精神討箇一歸何處著落自然不用看經公案便是一卷不斷頭經晝夜常轉何須又要頭上安頭若作恁麼工夫天龍自然護持何須祈禱但要絕世緣省言語古人道二十年不開口說話向後佛也奈何你不得生理事大無常迅速如人上山各自努力勉之偈曰

紅塵堆裏學山居

寂滅身心道有餘

但得胸中憎愛盡

不參禪亦是工夫

△拈古

世尊纔生下乃一手指天一手指地周行七步目顧四方云天上天下惟吾獨尊雲門云我當時若見一棒打殺與狗子吃貴圖天下太平

師云世尊大似靈龜曳尾自取喪身之兆雲門雖則全提正令也是爲他閑事盡無明當時但於地上劃一圓相就圓相中書箇丁字復展兩手示之管取水消瓦解

世尊一日陞坐默然而坐阿難白槌云請世尊說法世尊云會中有二比丘犯律行我故不說法阿難以

他心通觀二比丘遂乃遣出世尊還復默然阿難又白適來爲二比丘犯律是二比丘已遣出世尊何不說法世尊云吾誓不爲二乘聲聞人說法便下座

師云世尊能挽千鈞之弩銀山鐵壁箭箭皆通阿難雖有隱身之術殊不覺髑髏後中箭還有驕得過底麼

世尊有異學問諸法是常耶世尊不對又問諸法は無常耶亦不對異學曰世尊具一切智何不對我世尊云汝之所問皆爲戲論

師云異學有言若啞世尊無語如雷遮裏見

得分明正是增益戲論何故諦聽諦聽

世尊因自恣日文殊三處過夏迦葉欲白槌擯出纔拈槌乃見百千萬億文殊迦葉盡其神力槌不能舉世尊遂問迦葉汝擬擯那箇文殊迦葉無對

師云文殊知底迦葉不知迦葉知底文殊不知彼彼不知且置百千萬億文殊那箇是真底

世尊昔在靈山會上拈花示衆是時衆皆默然惟迦葉尊者破顏微笑世尊云吾有正法眼藏涅槃妙心實相無相微妙法門不立文字教外別傳付囑摩訶

迎葉

師云世尊扶頭迎葉扶尾直至如今擡舉不起莫有共著力者麼以兩手作扶勢云也只兀底

世尊於涅槃會上以手摩胸告衆云汝等善觀吾紫磨金色之身瞻仰取足勿令後悔若謂吾滅度非吾弟子若謂吾不滅度亦非吾弟子時百萬億衆悉皆契悟

師云黃面瞿曇四十九年顛之倒之橫說豎說貴圖末後慙慙殊不知賺他百萬億衆生

得分明正是增益戲論何故諦聽諦聽

世尊因自恣日文殊三處過夏迎葉欲白槌擯出纔拈槌乃見百千萬億文殊迎葉盡其神力槌不能舉世尊遂問迎葉汝擬擯那箇文殊迎葉無對

師云文殊知底迎葉不知迎葉知底文殊不知彼彼不知且置百千萬億文殊那箇是真底

世尊昔在靈山會上拈花示衆是時衆皆默然惟迎葉尊者破顏微笑世尊云吾有正法眼藏涅槃妙心實相無相微妙法門不立文字教外別傳付囑摩訶

迎葉

師云世尊扶頭迎葉扶尾直至如今擡舉不起莫有共著力者麼以兩手作扶勢云也只兀底

世尊於涅槃會上以手摩胸告衆云汝等善觀吾紫磨金色之身瞻仰取足勿令後悔若謂吾滅度非吾弟子若謂吾不滅度亦非吾弟子時百萬億衆悉皆契悟

師云黃面瞿曇四十九年顛之倒之橫說豎說貴圖末後慙慙殊不知賺他百萬億衆生

令墮在鐵圍山下無由解脫

馬大師因僧問離四句絕百非請師直指西來意師云我今日勞倦不能爲你說問取智藏去僧乃問藏藏云何不問和尚曰和尚教來問藏云我今日頭痛不能爲你說去問取海兄僧遂問海海云我到遮裏却不會僧回舉似師師云藏頭白海頭黑

師云馬師父子一門非特佛口蛇心亦善六韜三畧遮僧若無諸葛孔明之作管取喪身失命

僧問馬祖如何是佛祖云卽心是佛

師云衆中商量皆謂心本是佛佛外無心故云卽心是佛苦哉苦哉若作遮般見解明後日吃鐵棒有分在旣然如是合作麼生石壓筍斜出崖懸花倒生

百丈和尚凡叅次有一老人常隨衆聽法一日衆退惟老人不退丈問汝何人也老人云諾某甲非人也於過去迦葉佛時曾住此山因學人問大修行底人還落因果也無對云不落因果五百生墮野狐身今請和尚代一轉語貴脫野狐身遂問大修行底人還落因果也無丈云不昧因果老人於言下大悟作禮

云某甲已脫野狐身住在山後敢告和尚乞依亡僧事例丈令維那白槌告衆食後送亡僧大衆言議一衆皆安涅槃堂又無病人何故如是食後丈自領衆至山後巖下以杖挑出一死野狐乃依法火葬

師云大衆前云不落後云不昧還有得失也無若無因甚有墮有脫若有試舉出來分明道看有麼有麼總是一隊野狐精莫怪山僧壓良爲賤

忠國師因西天大耳三藏到京云得他心通肅宗帝命國師試驗三藏纔見忠乃禮拜立于右忠問汝得

他心通耶藏曰不敢忠云汝道老僧卽今在甚處藏曰和尚是一國之師何得去西川看競渡船忠良久再問汝道老僧卽今在甚處藏曰和尚是一國之師何得向天津橋上看弄獼猴忠第二問藏良久罔知去處忠叱云遮野狐精他心通在甚麼處三藏無對師云大小國師平生伎倆總被遮胡僧勘破雖然賴遇聖君證明

南泉住菴時一僧到泉乃云某甲上山作務請齊時作飯自吃了却送一分來其僧齋辦自吃了却將家事一時打破仍就床臥泉伺久不來遂歸見僧臥泉

亦去一邊臥僧便起去泉住後云我往前往菴時有箇靈利道者來直至如今不見

師云南泉雖則步步踏實未免隨人起倒遮僧縱解飽食高眠決定不知飯是米做高峰恁麼告報設有一字妄虛永墮拔舌地獄

趙州因僧遊臺山凡問一婆云臺山路向甚處去婆云驀直去僧纔行三五步婆云好箇師僧又與麼去後有舉似趙州云待我去勘過遮婆子明日便去亦如是問婆亦如是對州歸謂衆曰臺山婆子我爲勘破了也

師云遮箇公案若據諸方判斷趙州勘破婆
子若據高峰點檢將來正是婆子勘破趙州
畢竟以何爲驗以手指云驀直去

僧問趙州狗子還有佛性也無州云無

師云大小趙州拈出一粒巴豆子攪惱衲僧
腸肚設有吞吐得者亦不免喪身失命何故
急急如律令

僧問趙州萬法歸一一歸何處州云我在青州作一
領布衫重七斤

師云趙州一段綿密工夫風吹不入雨打不

濕惜乎不解相體裁衣翻成鈍置高峰則不
然忽有人問萬法歸一一歸何處只向他道
我二十年前曾向遮裏打失一隻眼睛至今
指鹿爲馬大衆且道與古人相去多少

甘贄行者聞接待凡有問行者接待不易者云譬如
餒驢餒馬瑯琊云快把飯來五祖和尚云願行者長
似今日

師云瑯琊和尚美則美矣只是做造愴忙不
堪供養五祖和尚不鑑來風一鏊淡齏羹可
惜着了許多鹽醋譬如餒驢餒馬只向他道

殘羹餽飯不勞拈出大眾且道與古人是同
是別定當得出日消萬兩黃金不然吃水也

須防噎

陸亘大夫問南泉弟子家中有片石亦曾坐亦曾臥
如今欲鑄作佛得麼泉云得得大夫云莫不得麼泉
云不得不得

師云南泉恁麼祇對正所謂聖人無常心以
百姓心爲心也

大夫嘗問南泉曰弟子家中於一瓶內養得一鵝兒
今年長大欲出此鵝且不得打破瓶亦不得損却鵝

禾審和尚有何方便泉召云大夫大夫應諾泉云出
也

師云南泉潦倒手眼不親縱饒出得也是死
貨高峰只向他道大夫還會示人麼纔擬祇
對便與亂棒打出非特爲遮漢脫却鶻臭布
衫要使天下衲僧箇箇解粘去縛慶快平生
木平問洛浦一漚未發時如何浦云移舟諳水脉舉
棹別波瀾平不契又問盤龍龍云移舟不別水舉棹
卽迷源平於此有悟後雲峰悅和尚云若於洛浦言
下悟去猶較些子後來不合向盤龍死水裏浸殺

師云若不是悅公泊被他瞞却然雖如是
且道盤龍諳訛在甚處移舟不別水舉棹卽

迷源

石鞏和尚凡見僧以弓架箭示之一日三平至鞏云
看箭三平乃撥開胸云此是殺人箭活人箭又作麼
生鞏乃扣弓絃三下平便作禮鞏云三十年架一張
弓兩隻箭只射得半箇聖人遂拗折弓箭

師云石鞏張弓傍若無人三平承箭弄巧成
拙然雖如是半箇聖人又作麼生落花片片
隨流水流水無心戀落花

雪峰在德山作飯頭一日飯遲方晒飯巾次乃見德
山自托鉢至法堂前峰遂問遮老漢鐘未鳴鼓未響
托鉢向甚處去山便回方丈峰舉似巖頭頭云大小
德山不會末後句山聞令侍者喚巖頭去問汝不肯
老僧那巖遂密啓其意山乃休去至明日陞堂果與
尋常不同巖至僧堂前撫掌大笑云且喜得老漢會
末後句他後天下人不奈伊何雖然如是也只得三
年

師云佛祖機緣古今公案其中諳訛無出於
此或謂巖頭智過於師故有密啓其意殊不

高僧語錄
人證明
知犯彌天之咎萬劫遭殃且道利害在甚麼處撫掌大笑云侍者分明記取三十年有有

雪峰示衆云南山有一條鼈鼻蛇汝等諸人切須好看時長慶出云今日堂中大人喪身失命雲門以拄杖攬向峰前作怕勢後僧舉似玄沙沙云須是稜兄始得然雖如是我則不然僧云和尚作麼生沙云用南山作麼

師云雪峰和尚雖慣作竊爭奈諸子不善參隨未免一場敗露至今千載之下惡聲猶在

僧問夾山如何是夾山境山云猿抱子歸青嶂裏鳥銜花落碧巖前後法眼道老僧二十年只作境話會師云大衆還會麼直饒向遮裏會得見法眼則易見夾山則難

僧問投子如何是十身調御子下繩床立又有問凡聖相去多少子亦下繩床立

師云一轉語天懸地殊一轉語言端語的具眼底試辨看

聲明三藏善別音聲劉大王請玄沙驗之沙乃將銅火筋敲鐵火爐問云是甚麼聲藏云銅鐵聲沙云大

王莫受外國人瞞

師云大小玄沙能所未忘當時賴遇是劉大
王若撞著箇本分衲僧管取一場漏逗

玄沙坐次見面前地上一點白指問侍者云見麼者
云見如是三問如是三對沙云你也見我也見因甚
麼道不會

師云大衆見卽見會卽會無復疑矣且道遮
一點白決定是箇甚麼

仙天和尙因一僧叅擬作禮次天云野狐兒見甚麼
了便禮拜僧云老禿奴見甚麼了卽便與麼問天云

苦哉苦哉仙天今日忘前失後僧云要且得時終不
補失天云爭不如此僧云誰甘天呵呵笑云遠之遠
矣僧以目四顧便出

師云一問一答有賓有主盡謂二俱作家若
據高峰點檢將來遮僧猶自可仙天笑殺人
和安通禪師因仰山作沙彌時常喚寂子與我拈床
子來仰持至通云送舊處著復問寂子床那邊是甚
麼曰無物遮邊聲曰無物通又召寂子子應諾通云
去

師云潦倒和安用心不減仰山命蹇爲魅所

著山僧恁麼道也是逆風秉炬

僧問佛日彌禪師如何是毘盧印彌云草鞵踏雪僧云學人不會彌云步步成跡

師云佛日和尚雖則不負來機高提祖印殊不知古篆難明致令遮僧遇如不遇若是高峰則不然忽有人問如何是毘盧印但言文不加點又云學人不會但云要會作麼且道與佛日是同是別

僧問高安澄禪師舊歲已去新歲到來還有不受歲者麼澄云作麼生僧云恁麼則不受歲也澄云城上

已吹新歲角窓前猶點舊年燈僧云如何是舊年燈澄云臘月二十日

師云大小高安被遮僧隨後一逐如鼠入牛角相似直至如今轉身不得莫有救得底麼且待來年

雪竇和尚示衆云客從遠方來遺我徑寸璧中有四箇字字字無人識佛鑑師拈云客從遠方來遺我徑寸璧中有四箇字不必重拈出

師云一大老一人說易一人說難未免見有偏枯高峰則不然客從遠方來遺我徑寸璧

中有四箇字字字無平仄

謂云一夫一人一德一人一德未成其德

字字無人無德而餘字各分數式來讀亦

且發來平

飲飲直直至咬今轉食不替莫不替其

謂云大小高安妙無曾韻對一級咬貝入半

登云觀

日次

△頌古

世尊在靈山會上拈一枝花暖青蓮目普視
大衆時百萬人天惟迦葉破顏微笑世尊云
吾有正法眼藏涅槃妙心實相無相微妙法
門付囑摩訶迦葉

靈山拈出一枝花百萬都來是作家惟有飲光猶未
譬那堪眼裏又添沙

世尊昔因文殊至諸佛集處值諸佛各還本
處惟有一女人近彼佛坐入於三昧文殊乃
白佛云何此人得近佛坐而不得佛告文

殊汝但覺此女令從三昧起汝自問之文殊
遶女人三匝鳴指一下乃托至梵天盡其神
力而不能出世尊云假使百千文殊亦出此
女人定不得下方過四十二恒河沙國土有
罔明菩薩能出此女人定須臾罔明大士從
地湧出作禮世尊勅罔明出罔明却至女子
前鳴指一下女子於是從定而出
兩兩成群罪莫窮謾將鼠伎逞英雄當時若作今時
世縱使瞿曇也不中
達磨大師一日命門人曰時將至矣汝等盍

各言所得乎時有道副對曰如我所見不執
文字不離文字而爲道用祖曰汝得吾皮又
尼總持曰我今所解如慶喜見阿闍佛國一
見更不再見祖曰汝得吾肉又道育曰四大
本空五蘊非有而我見處無一法可當情祖
曰汝得吾骨最後慧可大師出禮拜依位而
立祖曰汝得吾髓乃傳衣付偈
死款都來一口供情窮理極卒難容若將皮髓論高
下爭見花開五葉紅

僧問六祖黃梅意旨甚麼人得祖云會佛法

人得僧云和尚還得麼祖云我不得僧云爲甚麼不得祖云我不會佛法

祖師不會禪夫子不識字棒打石人頭曝曝論實事
僧問馬大師離四句絕百非請師直指西來
意師云我今日勞倦不能爲汝說去問取智
藏僧問藏藏云我今日頭疼不能爲你說去
問取海兄僧問海海云我到遮裏却不會僧
回舉似師師云藏頭白海頭黑
攢花簇錦絕纖塵一度拈來一度新啼得血流無用
處不如緘口過殘春

馬大師云卽心是佛又云非心非佛

殺人猶可恕再犯豈能容貶向無生國千聖不知蹤
藥山久不陞堂院王白云大眾久思和尚示
誨山示打鐘著時衆方集藥山便下座歸方
丈院王復白云和尚許爲衆說法因甚一言
不施山云經有經師論有論師爭怪得老僧
眉毛罇裏積山獄鼻孔中藏師子兒南北東西無限
意此心能有幾人知

瀉山云老僧百年後向山下作一頭水牯牛
左肋書五字云瀉山僧某甲此時若喚作瀉

山僧又是水牯牛喚作水牯牛又云瀉山僧
某甲且道喚作甚麼
綠樹陰濃夏日長樓臺倒影入池塘水晶簾動微風
起滿架薔薇一院香

甘贄行者因巖頭在家過夏一日把針次甘
贄前立頭乃以針作劊勢甘遂歸著衣擬出
禮謝妻乃問翁作甚麼甘云不得說妻云有
甚事也要大家知甘舉前話妻云從此三十
年後須知一度吃水一度噎殺人女子聞乃
云還知盡大地人性命被衾上座針頭上劊

將去也無

幸然無事鼓風濤激起洪波萬丈高直得渾家都浸
殺至今平地浪滔滔

趙州勘婆子

自小丹青畫不成年來始覺藝方精等閑擲筆成龍
去換却時人眼裏睛

趙州三佛

泥佛不度水毘嵐風忽起大地黑漫漫衲僧爭敢視
金佛不度爐鐵裹夜明珠一槌俱粉碎清光何處無
木佛不度火掣開金殿鎖內外絕遮攔時人猶慙懽

趙州無字

趙州狗子佛性無十分春色播江湖幾多摘葉尋枝
底空使洛陽花滿途

趙州一日在佛殿上見文遠侍者禮佛以拄
杖打遠一下遠云禮佛也是好事州云好事
不如無

禮佛修行不較多何須特地起干戈直饒打得回頭
後免子何曾離得窠

萬法歸一一歸何處

四面洪波萬丈深上天無路地無門箇中有理應難

訴不是愁人也斷寬

嚴陽尊者問趙州一物不將來時如何州云
放下著陽云一物不將來放下箇甚麼州云
看你放不下陽當下大悟

吞而復吐冷烟浮月落寒山猶未休重把絲綸輕一
擲豈知元只在鉤頭

尼問趙州密密意州以腕上招一招尼云和
尚猶有遮箇在州云你猶有遮箇在

猛虎深藏淺草窠幾回明月入烟蘿頂門縱有金剛
眼未免當頭蹉過他

臨濟示衆云赤肉團上有一無位真人常在
面門出入

颯颯秋風滿院涼
芬芳籬菊半經霜
可憐不遇攀花
手狼籍
枝頭多少香

僧問興化四方八面來時如何化云打中間
底僧便禮拜化云我昨日赴箇村齋中途遇
卒風暴雨却向古廟裏躡得過

饑火炎炎燒斷腸
親逢王篋不能嘗
可憐併逐溪流
去百億滄溟透底香

蕭宗皇帝問忠國師云百年後所須何物忠

云與老僧造箇無縫塔帝云就師請塔樣忠
良久云會麼帝云不會忠云吾有付法弟子
耽源却諳此事請問之後詔問源源乃有頌
云湘之南潭之北中有黃金充一國無影樹
下合同船琉璃殿上無知識

國師塔樣最尖新
靚面拈來不露文
却被耽源添一
線至今描邈亂紛紛

陸巨夫問南泉弟子家中有一片石也曾
坐也會臥擬鑄作佛得麼泉云得得巨云莫
不得麼泉云不得不得

楊柳溪邊垂綠線黃鶯枝上聲聲嘯幾多貪翫不知
春空使落花千萬片

靈雲見桃花悟道

三十年來在夢中生涯喪盡絕行蹤自慚一見桃花
後依舊漫天鼓黑風

玄沙云諦當甚諦當敢保老兄未徹在

落花臺上重鋪錦瑪瑙堦前布赤沙情義盡從貧處
斷世人偏向有錢家

夾山和尚示衆云我二十年住此山未嘗舉
著宗門中事一日有僧問承和尚有言二十

年住此山未曾舉著宗門中事是否山云是

僧便掀倒禪牀山休去至明日普請掘一坑

令侍者請昨日問話僧來山云老僧二十年

來只說無義語今請上座打殺老僧埋向坑

中便請便請上座若不打殺老僧上座自著

打殺埋此坑中始得其僧歸堂裝束潛去

紅輪杲杲正當空昨日今朝事不同盡謂古今都坐
斷誰知賊過後張弓

百丈云汝等爲我開田吾爲汝說大義僧開

田了白云開田已竟請和尚說大義百丈行

數步而立展開兩手

滯貨多年要脫身
巧粧綺語說諸人
及乎拈出當場
賣索價遼天誰敢親

雲門垂語云乾坤之內宇宙之間中有一寶

秘在形山拈燈籠向佛殿裏將三門來燈籠

上

弓絃走馬驀相逢
覲面全提未見功
拈出輪王三寸
鐵直教血濺梵天紅

僧問慈明如何是古佛家風
明云銀蟾初出海
何處不分明

銀蟾出海照無私
處處分明是阿誰
見面不須重問
訊從教日灸與風吹

僧問慈明如何是不動尊
明云提不起

不動尊提不起
茫茫宇宙誰能委
秋江清夜月澄輝
鷺鷥飛入蘆花裏

李駙馬問慈明我聞西河有金毛獅子
是不明云駙馬甚處得遮消息
李喝一喝明云野
狂鳴李又喝明云獅子吼

逆風吹又順風吹
鐵眼銅睛爭敢窺
萬古碧潭空界
月再三撈撈始應知

黃龍三關

佛手驢脚與生緣
鬼面人頭有許般
雲散碧天孤月朗
澄潭徹底影團團

五祖演和尚一日持錫遶廊云莫有屬牛人

問命麼衆皆無語自云孫贖今日開鋪更無

一人垂顧可憐三尺龍鬚喚作尋常破布

無端平地起干戈
爭似屬牛人更多
滿面慚惶無著

處低頭依舊入烟蘿

五祖演和尚謝監收上堂人之性命第一須

是○欲得成此○先須防於○若是真○人

○○○

一三三四五六圈心肝
粉碎髑髏穿若將方木
投圓窟醜媿爭教得少年

△補遺

若要真正決志明心先將平日胸中所受一切善惡之物盡底屏去毫末不存終朝兀兀如癡與昔嬰孩無異然後乃可蒲團靜坐正念堅凝精窮向上之玄機研味西來之密旨切切拳拳兢兢業業直教絲毫無間動靜無虧漸至深密幽遠微細極微細處譬如有人遠行他方漸漸回途已至家舍又如鼠入牛角看看走至尖尖盡底又如捉賊討賊拷至情理俱盡不動不退無去無來一念不生前後際斷卓卓巍巍孤孤迥迥如坐萬仞崖頭又若停百尺竿上一

念纔乖喪身失命將至功成九仞切須保任全提忽於經行坐臥處不覺因地一聲猶如死在漫天荆棘林中討得一條出身活路相似豈不快哉若是汨沒塵勞不求昇進譬如水上之浮木其性實下暫得身輕不堪浸潤又如庭中之花雖則色香俱美一朝色萎香滅無復可愛又如農夫之種田雖有其苗而功力不至終不成實便如貧窮乞兒得少爲足足久久萌芽再發荆棘復生被物之所轉終歸沉溺無上清淨涅槃無由獲覩豈不枉費前功虛消信施若是有志丈夫正好向這裏晦迹韜光潛行密用或三十年二

十年以至一生終無他念踏得實實落落穩穩當當
直教纖塵不立寸草不生往來無礙去住自由報緣
遷謝之日管取推門落臼若則恁麼紙裹茅纏龍頭
蛇尾非特使門風有玷亦乃退後學初心如上所述
管見莫不皆是藜藿之類飽人不堪供養以俟絕陳
之流終有一指之味往往學道之士忘却出家本志
一向隨邪逐惡不求正悟妄將佛祖機緣古人公案
從頭穿鑿遞相傳授密密珍藏以爲極則便乃不守
毘尼撥無因果人我愈見崢嶸三毒倍加熾盛如斯
之輩不免墮於魔外永作他家眷屬若有未遭邪謬

不負初心當念無常迅速痛思苦海沉淪趁二時粥
飯見成百般受用便當便好乘時直入莫待臨嫁醫
瘦此乃從上佛祖之心印無礙解脫之妙門設使機
緣不偶工力未充切須捨命忘形勤行苦行至死拚
生一心不退復有葛藤未盡不免重說偈言此心清
淨本無瑕只爲貪求被物遮突出眼睛全體露山河
大地是空花

叅禪若要尅日成功如墮千尺井底相似從朝至暮
從暮至朝千思想萬思想單單則是箇求出之心究
竟決無一念誠能如是施功或三日或五日或七日

若不徹去西峰今日犯大妄語永墮拔舌犁耕
若論此事如登一座高山相似三面平夷頃刻可上
極是省力極是利便若曰回光返照點檢將來耳朵
依前兩片皮牙齒依舊一具骨有甚交涉有甚用處
若是拏雲攫霧底漢子決定不墮這野狐窟中埋沒
自己靈光辜負出家本志直向那一面懸崖峭壁無
棲泊處立超佛越祖心辦久久無變志不問上與不
上得與不得今日也拚命跳明日也拚命跳跳來跳
去跳到人法俱忘心識路絕驀然踏翻大地撞破虛
空元來山卽自己自己卽山山與自己猶是冤家若

要究竟衲僧向上巴鼻直須和座颺在他方世界始
得

若論此事的的用功正如獄中當死罪人忽遇獄子
醉酒睡著敲枷打鎖連夜奔逃於路雖多毒龍猛虎
一往直前了無所畏何故則爲一箇切字用功之際
果能有此切心管取百發百中卽今莫有中底麼以
拂子擊禪床一下云毫釐有差天地懸隔

若論尅期取證如人擔雪填井不憚寒暑不分晝夜
橫也擔豎也擔是也擔非也擔擔來擔去縱使經年
越歲以至萬劫千生於其中間信得及踏得穩把得

定作得主會無一念厭離心會無一念懈怠心會無
一念狐疑心會無一心求滿心果能有恁麼時節果
能具恁麼氣槩到這裏管取入法雙忘心識俱泯形
如槁木朽株志若嬰兒赤子鶩然擔子卒地斷羖地
折永嘉道大千沙界海中漚一切聖賢如電拂好與
三十痛棒

若論此事不假長劫熏修積功累德亦不問賢愚利
鈍久習初機只貴孟八郎漢不顧危亡得喪發大憤
志起大疑情如善財童子叅勝熱婆羅門大火聚中
投身而入正恁麼時人法俱忘心機泯絕左之右之

墜著嗑著不是洞山麻三斤定是雲門乾屎橛若還
毘毘毘毘毘毘莫道親見高峰直饒向老胡肚
皮裏打一遭依前乾沒一星事

△偈頌

頌趙州無字示陳太尉

澄潭千載毒龍蟠倒嶽傾湫誰解看直下一刀成兩
段虛空粉碎髑髏乾

示如法禪人

識得根源認得伊全身猶墮在塵圍縱然和座都掀
倒尚有烟霞遶翠微
直造懸崖上上關白雲影裏轉身難箇中若使能通
變奪食驅耕總是閒
如如不動法中王舉足無非是道場不到水窮雲盡

處爭知覲面是檀郎

示如夢禪人行脚

閒處休居靜莫任轉入轉深轉幽固縱至深深盡底
時更須知有那一步昔日曹溪親到來今時往往多
差互若非喪盡目前機倒嶽傾湫無覓處

山中四威儀供佛鑑師翁韻

山中行步高身儘輕擬飛去惟恐世人驚
山中住黯淡雲無數誓相期共守無生路
山中坐靜看空花墮問何爲待結團纒果
山中臥月落猿啼過正堪眠石定從教破

雲庵

或淡或濃拖雨去半舒半捲逆風來爲憐途路無棲
泊却把柴扉永夜開

示徒

學道如初莫變心千魔萬難愈惺惺直須敲出虛空
髓拔却金剛腦後釘

學道之心似鏡明纖塵纔染便忘形廓然照出娘生
面一簇青烟鎖翠屏

學道如撐逆水舟向篙着力莫隨流忽然失脚翻身
去踏斷寒江月一鉤

又示徒

工夫果的有真疑動靜寒暄總不知枕子驀然開口
笑鉢盂蹠跳上須彌

示淳謙首座持鉢

千家萬家總是維摩丈室十斛百斛無非達磨眼睛
若向遮裏會得何勞向外經營其或未然咄酒肆淫
坊休放過龍宮虎穴要親臨

示徒三戒

開口動舌無益於人戒之莫言
舉心動念無益於人戒之莫起

二正上座煨骨 一人齒不壞

正上座兩不成雙一不成隻牙齒分明是具骨萬煨
爐中色正輝泥牛觸碎蒼龍窟

志光居士火 吳士

以火打團相云姑蘇水天目山總是維摩不二關烈
燄光中回首處依稀髣髴似人間

廣捨上座煨骨

取不得捨不得正恁麼時如何委悉咄剔起眉毛火
裏看分明一具黃金骨

明山都管火

以火打圓相云遮裏見得便見山卽山水卽水大洋
海底火星飛天目峰頭波浪起不然擲下火云家家
門前火把子

志明道人火

只遮一著子今古無傳授惟有明道人始終能保守
守鐵牛火裏翻筋斗

得意化主入塔

得意忘言逆行順化常在途中不離家舍彈指一下
塔戶開了也遍界髑髏無處藏遮裏全身俱放下

法雲上座火

9 170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8

汝名瞿曇佛名法曇分明舉似疑則別參擲火云大
洋海裏火燒龕

法華經疏卷第十

法華經疏卷第十

門前火吐子... 雲火星天目... 火火圓卧云... 雲火星天目... 火火圓卧云... 雲火星天目... 火火圓卧云...

△讚佛祖

觀音大士

大海波心磐陀石上真觀淨觀是相非相如月在天
無水不現水月俱捐如何瞻仰咄切忌妄想

達磨祖師

開旗展陣入梁邦未覩天顏早已降縱有神通難轉
欸翩翩一葦渡長江

三空請讚

未離西乾惡聲已布面壁九年一場敗露嘆不知賺
却多少兒孫直至如今釘椿插櫓

△自讚

師子院明初院主請

鼻無兩竅眼露雙睛十分無面目一味得人憎將正
續三世之業等閒籍沒向白雲千峰之上特地掀騰
坐斷死關幸自惡聲難掩那更被伊描邈轉見可憐
生呵呵呵三十年後寧無人路見不平

大覺禪師祖雍長老請

中大仰毒奮師子威平生負重病舉世無良醫向蓮
峰插一莖草爲少室發千鈞機舌頭無骨額下生眉
喚作開山卽錯不喚作開山猶非從教後代亂針錐

西隱接待師立山主請

地名西馬塍

烏豆眼睛生鐵面具向孤峰頂上將無米飯塞斷天
下衲子咽喉固是家常因甚更教人叅箇一歸何處
吽憶著江南三月天馬塍西畔春無數

雙髻禪菴請

恣無明逞人我誹釋迦罵達磨雖是赤心返成話墮
六年坐鋪賣不行至今被人喚作滯貨

禪人請讚

遮箇村僧只好聞名尾巴纔露天下人憎
不識巖頭密啓處剛言悟得仰山禪遮場敗露難遮

蓋雷與兒孫萬世傳

△行狀

師姓徐諱原妙蘇之吳江人受業秀之密印雪巖欽禪師的嗣生宋戊戌三月二十三日申時受具癸丑寶祐元年行脚辛酉得悟丙寅隱龍鬚苦行九載甲戌遷雙髻大元己卯上西峰辛巳入張公洞扁死關不越戶十五年學徒叅請無虛日僧俗授戒幾數萬人開山師子大覺元貞乙未臘月朔焚香說偈告衆坐亡春秋五十八臘四十三度徒弟幾百人以是月二十一日庚申全龕塔于死關之內從治命也

孝小師明初嗣法比丘祖雍 識

行狀

師諱原妙號高峰吳江人俗姓徐母周氏夢僧乘舟投宿而孕宋嘉熙戊戌三月二十三日申時生纔離襁褓喜跌坐遇僧入門輒愛戀欲從之游十五歲懇請父母出家投嘉禾密印寺法住爲師十六薙髮十七受具十八習天台教二十更衣入淨慈立三年死限學禪一日父兄尋訪巍然不顧二十二請益斷橋倫令叅生從何來死從何去話於是脇不至席口體俱忘或如廁惟中單而出或發函忘肩鐻而去時同

叅僧顯慨然曰吾已事弗克辦曷若輔之有成朝夕
護侍惟謹時雪巖欽寓北碯塔欣然懷香在扣之方
問訊卽打出閉却門一再在始得親近令看無字自
此叅扣無虛日欽忽問阿誰與你拖箇死屍來聲未
絕卽打如是者不知其幾師扣愈虔值欽赴處之南
明師卽上雙徑叅堂半月偶夢中忽憶斷橋室中所
舉萬法歸一一歸何處話疑情頓發三晝夜目不交
睫一日少林忌隨衆詣三塔諷經次擡頭忽覩五祖
演和尚真讚云百年三萬六千朝返覆元來是遮漢
驀然打破拖死屍之疑其年二十四矣解夏詣南明

高僧語錄

卷三

欽一見便問阿誰與你拖箇死屍到遮裏師便喝欽
拈棒師把住云今日打某甲不得欽曰爲甚麼打不
得師拂袖便出翌日欽問萬法歸一一歸何處師云
狗舐熱油鑊欽曰你那裏學遮虛頭來師云正要和
尚疑著欽休去自是機鋒不讓次年江心度夏迤邐
由國清過雪竇見西江謀希叟曇寓旦過曇問曰那
裏來師拋下蒲團曇曰狗子佛性你作麼生會師云
拋出大家看曇自送歸堂暨欽挂牌于道場開法于
天寧師皆隨侍服勞屢將有所委任辭色毅然終不
可強一日欽問日間浩浩時還作得主麼師云作得

高僧語錄行狀

卷三

主又問睡夢中作得主麼師云作得主又問正睡著時無夢無想無見無聞主在甚麼處師無語欽囑曰從今日去也不要汝學佛學法也不要汝窮古窮今但只飢來吃飯困來打眠纔眠覺來却抖擻精神我遮一覺主人公畢竟在甚麼處安身立命丙寅冬遂奮志入臨安龍鬚自誓曰拚一生做箇癡猷漢決要遮一著子明白越五載因同宿友推枕墮地作聲廓然大徹自謂如泗州見大聖遠客還故鄉元來只是舊時人不改舊時行履處在龍鬚九年縛柴爲龕風穿日炙冬夏一衲不扇不爐日搗松和糜延息而已

嘗積雪沒龕旬餘路梗絕烟火咸謂死矣及霽可入師正宴坐那伽甲戌遷武康雙髻峰蓋和菴主攀緣又上一稜層之意也及至學徒雲集然菴小難容乃拔其尤者居之丙子春學徒避兵四去師獨掩關危坐自若及按堵啓戶視師則又疇昔雪中那伽也於是戶履彌夥應接不暇乃有柳樑橫肩不顧人直入千峰萬峰去之語已卯春腰包宵遁直造天目西峰之肩有獅子巖拔地千仞崖石林立師樂之有終焉之意弟子法昇等追尋繼至爲葺茅蓋頭未幾募羶之蟻復集師乃造巖西石洞營小室如舟從以丈

衡半之榜以死關上漚下淖風雨飄搖絕給侍屏服用不澡身不雉髮截甕爲鐺併日一食晏如也洞非梯莫登徹梯斷緣雖弟子罕得瞻視乃有三關語以驗學者云大徹底人本脫生死因甚命根不斷佛祖公案卽是一箇道理因甚有明與不明大修行人當遵佛行因甚不守毘尼儻下語不契遂閉門弗接自非其大根負大志鮮不望崖而退雪巖方住大仰凡三喚師堅臥不起遂有竹篋塵拂及綠水青山同一受記語來授師懷中瓣香始於人天前拈出道風所屆日益遠遂有他方異域越重海踰萬山而來者矣

鶴沙瞿提舉皈敬有年辛卯春得登山一瞻師顏恍如宿契惠然施巨莊瞻海衆師曰多易必多難吾力弗克勝堅拒之施心彌篤乃命僧議以此田歲入別於西峰建一禪刹請於官而後營之師欲不從不可得也爰得勝地名蓮華峰岡脉形勢天造地設得請以大覺禪寺爲額請祖雍權管寺事田四稔所營亦旣什三師有厭世之心矣師患胃疾已數年然起居飲食待人接物皆未嘗廢乙未十一月二十六日祖雍偕明初來省師師竟以末後事付囑遂取兩真軸口占二讚乃書之十二月初一日黎明辭衆云西峰

三十年妄談般若罪犯彌天末後有一句子不敢累及平人自領去也大衆還有知落處者麼良久云毫釐有差天地懸隔衆皆哀慟不已至辰巳間說偈曰來不入死關去不出死關鐵蛇鑽入海撞倒須彌山泊然而寂啓龕七日端然如生緇素奔哭者填咽越二十一日庚申塔全身于死關遵遺命也壽五十八臘四十三弟子僅百人受毘尼及請益者數萬人示寂後遠邇之人恨不得承顏領誨於塔前慟哭然頂煉臂者猶憧憧不絕師平日以慈悲爲人自任其在龍鬚也有僧若瓊焚祠牒從師忽染病師告之曰病

中絕緣正好做工夫汝臭皮袋皆委之於我但和病捱去決不相賺且在供給而啓發之因其思醋爲遠乞以歸得酒焉復易之往返四十里以濟其一啜病亟索浴俯見湯影卽有省喜笑如脫沉疴信宿書曰三十六年顛倒今日一場好笑娘生鼻孔豁開放出無毛鐵鷄師問如何是娘生鼻孔瓊豎起筆師曰又喚甚麼作無毛鐵鷄瓊擲筆而逝或有問予所紀詳一而遺衆何也喬祖曰被亡而晦恐逸故書師自雙峰而至死關風勵學者入室不以時每見一期將終上堂誨示誨諄甚至繼以悲泣平居誨人世出世法

皆懇懇切至軟語咄咄和易如坐春風中使人醉心
悅服咸自謂得師意及至室中握二尺黑蛇鞭笞四
海龍象則絲毫無少容借來者如登萬仞山而躋水
崖雪磴進無所依退無所據莫不凜然失其所執設
有不顧性命強爭鋒者師必據其案欵盡底搜詰破
石驗璞刮骨覘髓勘冀深淺真僞定其是非與奪卸
僧伽黎痛決烏藤以明正其賞罰嘗語學者曰今人
負一知半解所以不能了徹此事者病在甚處只爲
坐在不疑之地自謂千七百則公案不消一喝坐却
曲象床子及乎被叅徒下一喝則不能辯其邪正往

住一句來一句去如小兒相撲伎倆相角蓋是從前
得處莽鹵故也直須叅到大徹之地親見親證明得
差別智方能勘辨得人方能殺活得人此是吃折脚
鐺中飯底工夫做到未易以口舌爭勝負也假如兩
人從門外來未見其面同時下一喝且道那一箇有
眼那一箇無眼那一箇深那一箇淺還辨得出麼師
之機用不可湊泊下語少所許可其門戶險絕如此
復念今時學者不能以戒自律縱有妙語亦難取信
於人乃有毘尼方便之設焉師寓南竺日嘗誤踏一
筍取而食之其後賣衣告償枿薪擘果見蟲復全而

置之瀘水囊終身不廢師之細行涅南山之竹莫能
殫姑舉是數端以識其梗槩使後之欲見師而不可
得者覽斯文亦足以景仰遺風於萬一云耳良渚信
士全從進得師所剪髮盛以香奩朝夕供禮一旦光
明遍室視奩中含利纍纍如貫珠師隱山前後三十
年爲已爲人惟其一出於真實故天下之人若僧若
俗若智若愚上而公卿士夫下及走卒兒童識與不
識知與不知皆合手加額曰高峰古佛天下大善知
識也喬祖自師至西峰卽往叅覲歲或十餘往往必
留旬浹承教詔警策者至矣示本分鉗錘外時以孔

孟老莊微言要旨立難問而啓迪之益見師隨機設
化之方也師未嘗握管今語錄中有一二偈讚十數
頌古皆雙峰時所作爲弟子竊記者乃若示徒之語
一句一字皆前所謂踐履真實中流出假言以顯道
而已師貌清古體修偉常俛首而坐非問道不答聞
說人過則首愈低久病癰甚坡翁省夫禪師病有云
瑟瑟寒松露骨兢兢老虎垂頭殆爲師傳神也十數
年間兩處成道場而未嘗過日少干懷焉喬祖從師
游最久交諸耆舊最多故知師之出處言行最詳師
之徒弟明初以掇集之事見囑不敢以才謝辭敬焚

香滌慮拜手以述將求銘於大手筆云謹狀

△塔銘

前朝請大夫眉山家 之與 撰

夫子之道不憤悱則不啓發瞿曇之道不勇猛則不
精進道固未易知也古之釋子山棲林巢草衣木食
死灰墻壁其身心而不悔者爲一大事耳後之真能
爲大事者千萬人一人高峰是已師名原妙吳江徐
氏子母夢癭僧而免幼嗜跌坐稍長從嘉禾密印寺
老宿法住出家習天台教不契入淨慈立死限學禪
脇不席食不味見斷橋倫令叅生從何來死從何去

見雪巖欽令叅狗子無佛性且問誰拖汝死屍來應
聲卽棒嘗疑萬法歸一一歸何處見雙徑五祖真贊
疑始泮從欽南明欽申前問師喝欽拈杖師把住云
今日打某甲不得拂袖徑出翌日欽又問萬法歸一
話師云狗舐熱油鑪自此當機不遜尋過雪竇見西
江謀希叟曇復從欽雪之道場欽時居立僧與偕赴
天寧欲浼以事掩耳不顧欽嘗問日間浩浩作得主
麼師云作得主夢中何如云作得主正睡著時無夢
想見聞主在甚處師無語欽囑云從今不責汝學佛
學法只飢飯困眠纔覺抖擻精神看此際主人翁竟

何在師益警省咸淳丙寅冬入龍鬚山臥薪飯松風
鏗日搏誓欲一著子明白粵五載中夜摧枕墮地有
聲廓然大悟會積雪路絕數日人謂師已矣雪霽宴
坐如初甲戌遷武康雙髻峰德祐丙子春大兵至師
絕食兼旬危坐不動事定戶屢紛至已卯春避入西
天目之師子巖卽石洞營小室丈許榜曰死關悉屏
給侍服用破甕爲鐺併日一食洞梯山以升弟子罕
面共築師子院以居有三關語示衆云大徹底人本
脫生死因甚命根不斷佛祖公案只是一箇道理因
甚有明與不明大修行人當遵佛行因甚不守毘尼

弗契卽拒戶不納會欽寄竹篋拂子法語瓣香拈出
道價日隆遠方異域問道踵接運副鶴沙瞿君霆發
敬慕師一見機契卽捨田庄爲供師辭不受君捨心
益堅俾其徒以田別建一刹食卜蓮華距巖可十里
請於官扁大覺禪寺以祖雍攝寺事乙未子月二十
七日師忽書二真軸以後事囑明初祖雍臘朔上堂
云西峰三十年妄談般若罪犯彌天末後一句不敢
累及平人自領去也大衆還有知落處者麼良久云
毫釐有差天地懸隔別書偈云來不入死關去不出
死關鐵蛇鑽入海撞倒須彌山泊然而逝庚申奉遺

命全歸死關師嘉熙戊戌三月二十二日生壽五十八臘四十三弟子百人受戒請益者萬數遠近奔赴燃香臂頂慟哭填咽師清明枯淡篤志求道頓悟之後屏居窮山跬步不出內心無喘外息諸緣欣然自得爲人至慈勤懇誨人善語和易或繼以泣及至室中行祖令鞭策龍象盡情勘覈絲粟無貸嘗戒學者今人負一知半解不能了徹叅徒一詰茫然莫辨邪正向來句去如手搏兒蓋得處鹵莽故也直須大徹親見親証明得差別智方解勘辨殺活機用嶮峻不可湊泊如此尤矜細行崇戒律雖創兩利目未嘗觀

而行解真實名震江湖識與不識皆手額讚歎曰古佛善知識也余弱冠從無準翁遊師準孫也創院立莊兩囑以記心降久矣諸徒持事狀求銘烏得辭銘曰

高峰屹立

祖孫一律

妙年求道

力久真積

空山夜澄

撲地枕聲

玄關劃開

宇宙斬新

萬法歸一

一歸何處

熱油一句

大地起舞

西峰死局

餘三十齡

雲包雪笠

朋來于門

一絲不掛

萬仞如壁

9
170
1
2
3
4
5
6
7
8
9
180
1
2
3
4
5
6
7
8
9
190
1
2
3
4
5
6
7
8

近不可泊

遠不可卽

斷衲子命

了佛祖心

手扶重雲

霽月千林

鐵蛇入海

虛空百碎

我作銘詩

無在不在

高峰禪師語錄 終


浙江嘉興府楞嚴寺般若堂本年坊費重刻

高峯語錄共字三萬二千三百十九箇

該共銀一十八兩七錢三分

康熙丁未年十月七日





上

下